

萬有文庫

第一第一千種


王雲五主編

通志略

(十)

鄭樵著

商務印書館發行



通 志 略

(十)

著 樵 鄭

國 學 基 本 叢 書

謚略第一

謚上

臣謹按。字有不可避諱者。謚法是也。故此三篇並從本字。

序論第一

古無謚。謚起於周人。羲皇之前。名是氏。亦是號。亦是。至神農氏。則有炎帝之號。軒轅氏。則有黃帝之號。二帝之號。雖殊名氏。則一焉。堯曰陶唐。舜曰有虞。禹曰夏后。湯曰殷商。則氏已異於名。堯曰放勳。舜曰重華。禹曰文命。湯曰武王。則號已異於氏。然是時有名號。

之別者。不過開基之祖耳。夏自啓。商自太甲。皆一名而生。死通稱。若其曰祖曰宗。爲中爲高。則又不可常也。以諱事神者。周道也。周人卒哭而諱。將葬而謚。有諱則有謚。無諱則謚不立。蓋名不可名已。則後王之語前王。後代之及前代。所以爲昭穆之次者。將何以別哉。生有名。死有謚。名乃生者之辨。謚乃死者之辨。初不爲善惡也。以謚易名。名尚不敢稱。况可加之以惡乎。非臣子之所安也。嗚呼。春秋紀實事。而褒貶之說行。謚法別昭穆。而美刺之說行。當其時已紛紜矣。後之人何獨不然。臣恐褒貶之說不已。則春秋或幾

乎息矣。於是作春秋考春秋傳。又恐美刺之說不已。則周公之意其亡矣夫。於是作謚法。使百代之下。爲人臣爲人子者。知尊君嚴父。奉亡如存。不敢以輕重之意行乎其間。以傷名教者也。

序論第二

天下有難行之道。雖曰古有是道。而後世終不可行者。非古有是道也。後之人設是道以實之耳。豈有可行於古而不可行於今之道乎。若曰臣子可以議君父之得失。使有德則謚善。無德則謚惡。大行受大名。細行受細名。行生於己。名生於人。此真不可行之道。

也。自非伐無道，誅有罪，收其鯨鯢，以爲京觀，則安得有惡謚之稱乎？臣以爲立謚之意，本爲昭穆，命謚之義，取於尊隆。且生有惡，死無惡者，人之情也。生可簡，死不可簡者，禮之事也。生雖侯伯，死必稱公。生不踰等，死必加等。先王之通制也。豈有稱生之號有隆，而命死之名有虧乎？謚亦有惡，惡謚非所以加君父也。子曰：父在觀其志，父沒觀其行，三年無改於父之道，可謂孝矣。不若是，是不當於人心。子議父，臣議君，秦人之所厭而削之也。今先儒之所爲謚者，正秦人之論耳，不合乎古道。

序論第三

按謚法惡謚莫如桀紂其次莫如桓靈其次莫如幽厲此古今之所聞也以臣所見皆不然桀紂是名耳非謚也名者生之所命而非死之所加也當夏之季當殷之興則未有謚桀非謚也當殷之季當周之興雖有謚法然得謚爲榮不得謚爲辱名之以紂辱莫大焉桀之所名者取於木猶高柴公孫枝之所取云耳豈有賤人多殺之名而可以爲名乎紂之所名者取於絲猶臧紇南宮縚之所取云耳豈有殘義損善之名而可以爲名乎是名也非已之所更卽父兄之

所命也。安得有是義乎。桓於經典，竝無惡義。如公執桓圭，桓乃珪璋之首稱。如桓桓武王，桓乃果毅之盛德。齊之桓公，用能霸業。周之桓王，元無累行。安得桓爲惡名乎。靈者神聖之異名。周之東也，王綱不振，四方解體。迨夫靈王，周道始昌，諸侯服從。故傳曰：惟有鬻王甚神聖，以其生有神聖之德，死則謚之以靈，是爲名實允當。其曰請爲靈若厲者，荆蠻不根之論也。安得靈爲惡名乎。幽者隱之竝名也。周幽王喪於犬戎之禍，魯隱公卒於羽父之難，皆臣子所不忍言。故以幽隱命之，痛惻之甚也。豈有擁遏不通之義乎。語

曰子温而厲威而不猛恭而安厲與安竝德故於厲言而猛則異於是故於猛言不厲非惡也豈有暴虐無親之義乎厲王過矣使厲王而有暴虐無親之名則宣王不得爲孝子幽王過矣使幽王而受擁遏不通之責則晉文侯鄭武公不得爲良臣成周之法初無惡謚謚之有惡者後人之所立也由有美刺之說行然後人立惡謚

序論第四

謚之有善惡者卽文而見不卽說而見且曰矣曰刺豈不見其有凶德何必以不悔前過然後爲矣暴慢

無親然後爲刺乎。一矣。不足其說。又益之以及。一刺不足其說。又益之以刺。非古之道也。曰蕩曰荒。豈不見其有淫行。何必好內遠禮。然後爲蕩。縱樂無度。然後爲荒乎。一蕩不足其說。又益之以蕩。一荒不足其說。又益之以荒。非古之道也。謚之善惡。可卽一文以見義。一文不得而盡者。卽復文以見義。復文不足以盡者。又從而加之。如衛之公孫枝。是爲惠貞。文子亦古之道。何必爲之說以釋之乎。釋之之言既多。又非載籍之常義。學者而盡欲以善惡之義通之。其有名實相違而義不可通者。則必迂其說曲而通之也。桀

紂初非惡名桓靈亦非惡謚由其君而衆惡所集使
名與謚不能主也人聞其名見其謚則翕然以爲惡
矣且愛人愛其人之烏惡人惡其人之狗烏狗何與
於善惡但隨人好惡所生矣是以君子惡居下流故
名之曰幽厲

序論第五

法之爲謚者取一文耳非有說也謚法行而其說紛
紛其書見於世者有周公謚法有春秋謚法有廣謚
有今文尚書有大戴記有世本有獨斷有劉熙之書
有來奧之書有沈約之書有賀琛之書有王彥威之

書有蘇冕之書。有扈蒙之書。有蘇洵之書。其實皆由漢魏以來。儒生取古人之謚。而釋以已說。集而爲法也。故蘇氏曰。周公之法。反取賀琛之新法。而載之書。是知世之謚法。其名尤古者。益非古法也。今考周公之書。所用後人之語甚多。是皆爲謚法者。展轉相因。言文雜揉。無足取也。惟沈約之書。博採古今。詮次有紀。然亦無所建明。至蘇氏承詔。編定六家謚法。乃取周公春秋廣謚。沈約賀琛扈蒙之書。斷然有所去取。其善惡有一成之論。實前人所不及也。皇也。帝也。王也。公也。侯也。君也。師也。長也。胥也。實尊卑之號。上下

之稱。且生有爵，死有謚，以是爲謚。未之敢聞也。若帝王可以爲謚，則天子亦可以爲謚矣。若公侯可以爲謚，則卿大夫亦可以爲謚矣。若師長可以爲謚，則父兄亦可以爲謚矣。無義之談，莫此爲甚。經幾百年間，而後蘇子闢之。堯取累土以命名，舜取濃華以命名，禹取於獸，湯取於水，桀以喬木，紂以繹絲，是非已之所更必。父兄之所命也。且生有爵，死有謚，以是爲謚，未之敢聞也。蘇氏未暇及，臣不敢後焉。謹條其可用者二百十謚，分爲三類，只以一文見義，無事乎文之廣，無事乎說之繁，庶乎表裏蘇氏之學，是亦典禮之

大者。

謚中

上謚法

神聖賢文武成康獻懿

元章釐景宣明昭正敬

恭莊肅穆戴翼襄烈桓

威勇毅克壯圉或作禦魏安

定簡貞節白匡質靖真

順思考勗顯和玄高光

大英睿博憲堅孝忠惠

德仁智慎禮義周敏信
達寬理凱清直欽益良
度類基慈齊深溫讓密
厚純勤謙友祁廣淑儉
靈榮厲比絜舒賁逸退
訥惇速懋宜括察通儀
經庇協端休悅綽容確
恒熙洽紹世果

右百三十一謚用之君親焉用之君子焉

中謚法

懷悼 愍亦作哀隱 幽冲 夷

懼息 攜 鄙 愿 傲

右十四謚用之閔傷焉用之無後者焉

下謚法

野	夸	躁	伐	荒	煬	戾	刺	虛
蕩	墨	憊	亢	干	福	專	輕	苛
介	暴	虐	愎	悖	凶	慢	忍	毒
惡	殘	曩	穰	頑	昏	驕	酗	酒
僥	狂	侈	惑	靡	溺	偽	妄	讟
諂	誣	詐	譎	訕	詭	姦	邪	慝

蠱 危 圯 懦 撓 覆 敗 斲 疵
饗 費

右六十五謚。用之殲夷焉。用之小人焉。
凡上中下謚共二百十言。以備典禮之用。

謚下

後論第一

凡蘇氏所取一百六十八謚。三百十一條。臣今只即
一文以見義。即文可以見文。不必曰施而中理曰文。
經緯天地曰文。即武可以見武。不必曰克定禍亂曰
武。保大定功曰武。即孝可以見孝。不必曰慈惠愛親

曰孝能養能恭曰孝即忠可以見忠不必曰盛衰純固曰忠臨患不忘曰忠且即文以見義則文簡而義顯舍文而從說則說多而義惑蘇氏所削爲多矣臣今復削去三百十一條之說只從百六十八謚而增損焉實得二百十謚分而爲三上謚百三十用於君親用於君子下謚六十五用於殲夷用於非君子中謚十四用於閔傷用於無後者其有堯舜禹湯桀紂六文乃人名非謚法所宜去也陳胡公滿者言其老也有胡苟之稱焉胡非謚義齊有丁公名也漢有丁公姓也丁非謚義故去胡去丁曰商曰使曰軍曰趨

曰鼎曰莫曰敵曰震曰攝曰革曰易曰素曰頃凡十
三文雖有其謚於辭義未安所宜去也曰原曰愛曰
聲曰聞曰要曰強曰平凡七文雖可用於義不專
亦宜去蘇氏所取者百六十八謚今去其二十八凡
蘇氏所去者百九十八今取其七十二謚披沙得金
甄金去土非相違也而相從也

後論第二

蘇氏去其歷代所以爲尊卑之號者九皇帝王公侯
君師長胥是也子曰左丘明恥之丘亦恥之蘇氏去
其義之不安者八今取其賁取其逸所以待丘園也

蘇氏去其子孫不忍稱者九十四。今取其暴，取其虐，取其悞，取其凶，取其悖，取其慢，取其忍，取其毒，取其惡，取其異，取其攘，取其頑，所以待暴戾，取其昏，取其驕，取其醜，取其洩，取其僥，取其徂，取其侈，取其惑，取其靡，取其溺，所以待淫侈，取其諂，取其僞，取其讒，取其妄，取其誣，取其詐，取其謫，取其訕，取其詭，取其姦，取其邪，取其慝，取其蠱，所以待姦回，取其危，取其圯，取其撓，取其覆，取其敗，取其斲，所以待覆亡，取其懦，取其疵，取其饕，所以待貪鄙。蘇氏去其名之不能舉，其人之要者八。今取其退，取其訥，所以待恬退之士。

取其修取其訓。所以待禮法之人。蘇氏去其鄙陋。不足以訓者十有一。今取其僇取其速。爲靖專者備也。蘇氏去其泛濫。不可指明善惡之狀者七。今取其懋。爲黽勉者備也。取其宜。爲中庸者備也。蘇氏去其重複而無益於用者五十七。今取其哲。有異於智也。取其察。有異於明也。取其通。有異於敏也。取其儀。有異於穆也。取其經。有異於憲也。取其庇。有異於禮也。取其協。有異於順也。取其端。有異於直也。取其費。有異於夸也。取其休。取其悅。有異於凱也。取其綽。取其容。有異於寬也。取其確。取其恒。有異於介也。取其熙。取

其洽有異於和也。

後論第三

蘇氏於百六十八謚之外，有七去，三百十一條之中，有六類，七去者，削其文六類者，易其義，臣今此書，只以文顯，不用義說，故於六類，亦無所用，但第四類中，比儉二義，於文未安，不得不爲之說，儉乃恭儉之儉，比乃協比之比，儉也比也，古之美謚也，蘇氏引儉則固之義，而更之曰菲薄廢禮曰儉，引君子周而不比之義，而更之曰事君有黨曰比，以比儉二謚，內於惡德，此臣之所不取也，儉若爲惡德，則夫子溫良恭儉

之儉其將何處比若爲惡德則協比其鄰婚姻孔云之比其將何爲若之何以不中禮之儉爲儉朋比之比爲比乎臣今易置從古道也

後論第四

語曰孔文子何以謂之文也子曰敏而好學不恥下問是以謂之文也然則文子之謚初無謚法仲尼則因問而卽其人之行事以釋之奈何先立其法必使人之曲中也規矩本爲方圓設而非豫爲小大劑量使制器者範圍於此况所作之法只採經傳之言其間有大不通理處子曰敏而好學不恥下問是以謂

之文而云敏而好學曰文可也。孟子曰：陳善閉邪謂之敬。而云陳善閉邪曰敬可也。易之益曰：君子見善則遷，有過則改。而云遷善改過曰益可也。左氏曰：共用之謂勇。而云率義共用曰勇可也。奈何詩曰：哿矣能言，巧言如流。曰哿可乎。書曰：賓于四門，四門穆穆。而云闢于四門曰穆可乎。傳曰：季子生而有文在其手曰友，遂命之。而云有文在手曰友，何義也。書曰：乃聖乃神，乃武乃文。而云乃聖乃神曰武，何義也。詩序曰：太平之君子能持盈守成。而云持盈守滿曰成，何義也。至於終始如一者，則謂之終爲人所渴望者則

謂之渴於義安乎取竝后匹嫡之義而爲竝取牝雞
之晨惟家之索義而爲索是可用乎千百年間學者
見之禮官博士行之而斷無以爲非者

謚略第一

器服略第一

尊彝爵觶之制

臣舊嘗觀釋奠之儀而見祭器焉。可以觀翫。可以說義。而不可以適用也。夫祭器者。古人適用之器。若內圓而外方。內方而外圓。若之何飲食。若臺而安器。若器而安臺。或盛多而受少。或質輕而任重。若之何持執。以此事神。其不得於古之道明矣。原其制作。蓋本於禮圖。禮圖者。初不見形器。但聚先儒之說而爲之。是器也。姑可以說義云耳。由是疑焉。因疑而思。思而得。古人不徒爲器也。而皆有所

取象故曰制器尚象。器之大者莫如罍。物之大者莫如山。故象山以制罍。或爲大器而刻雲雷之象焉。其次莫如尊。又其次莫如彝。最小莫如爵。故受升爲爵。受二斗爲彝。受五斗爲尊。受一石爲罍。按獸之大者莫如牛象。其次莫如虎。雖禽之大者則有雞鳳。小則有雀。故制爵象雀。制彝象雞鳳。差大則象虎。雖制尊象牛。極大則象象。尊罍以盛酒醴。彝以盛明水。鬱鬯爵以爲飲器。皆量其器所盛之多寡而象禽獸賦形之大小焉。臣謹按沈約與劉查論宗廟犧尊。約云。鄭康成答張逸。謂爲畫鳳凰。

尾婆娑然。今無復此器。則不依古。查曰。此言未必可。按古者尊彝皆刻木爲鳥獸鑿頂及背。以出內酒。魏時魯郡地中得齊大夫子尾送女器。有犧尊。作犧牛形。又晉永嘉中曹疑於青州發齊景公冢。得二尊形。亦爲牛象。此古之尊彝爲可據也。又按王肅注禮。以犧象二尊並全刻牛象之形。鑿背爲尊。其說益可據也。又按陸佃禮象所記章惇家有古銅象尊三足。象其鼻形。望而視之。眞象也。此又見象尊之制出於近代矣。又按爵與觶皆飲器。觶大而爵小。陸佃禮象云。今秘閣及文彥博李公麟

家皆有古銅爵。有首有尾有柱有足有柄。祭統曰。尸酢夫人執柄。夫人授尸執足。先儒謂柄爲尾。蓋不見此制焉。然古銅爵今之士大夫家亦多有之。臣見者屢矣。謂其口似雀之狀。如今之荷葉杯。葵花盞。皆取其口之象。而非謂通體爲雀也。今祭器之爵。徒設雀形。而妨於飲者。按禮器云。卑者舉角。注云。四升曰角。角之類。則有觚。有觶。有散。有觥。觶與爵同爲飲器。而爵爲小。角與觚。觶。散。觥。同爲一類。而觥爲大。故觥則取兕角。而以爲罰器。兕之爲獸。獸之大者也。按舊圖。匏爵用匏片爲之。則知角

爵刻角爲之。所謂觚謂觶謂散謂觥者。名號不同。大小異制耳。

君臣冠冕巾幘等制度

歷代冕弁

黃帝作冕垂旒。目不邪視也。充纊耳不聽讒言也。唐虞以上冠布無綫。夏后以牟。追以收。商制章甫。或以皐。形制並無文。周制弁師掌王之五冕。皆玄冕朱裏。纒紐五采。繅十有二就。皆五采。玉十有二。玉笄朱紘。諸侯及孤卿大夫之冕。各以其等爲之。秦滅禮學。郊社服用。皆以衺玄。漢興草創。仍秦之舊。蔡邕獨斷云衺衺緝纒也。班

固東都賦注云及光武踐阼郊祀天地明堂皆冠旒

冕前後邃緹孝明帝永平初詔有司采周官禮記尚

書夏侯氏說公卿以下冕皆廣七寸長尺二寸前圓

後方朱綠裏玄上前垂四寸後垂三寸係白玉珠爲

十二旒以其綬采色爲組纓禮記曰玄冠朱組纓天子之服是也其旒珠用

真白玉三公諸侯七旒青玉珠卿大夫五旒黑玉珠皆

有前無後各以其色綬爲組纓旁垂黻纁助天子郊

祀天地明堂則冠之魏因漢故事明帝好婦人之飾

冕旒改用珊瑚珠晉因之東晉元帝初過江服章多

闕而冕飾以翡翠珊瑚雜珠侍中顧和奏舊禮冕旒

用白玉珠。今美玉難得。可用白璇珠。從之。後帝郊祀。天地明堂宗廟。及元會臨軒。改服黑介幘。通天冠。平冕。卓表朱綠裏。廣七寸。長一尺二寸。加於通天冠上。前圓後方。垂白玉珠十二旒。以朱組爲纓。無綬。王公卿助祭郊廟冠平冕。王公八旒。卿七旒。組爲纓。色如綬也。宋因之。更名曰平天冕。天子郊祀及宗廟服之。王公並用舊法。齊因之。梁因之。其制前垂四寸。後垂三寸。旒長齊肩。以組爲纓。色如其綬。傍垂黻纁充耳。珠以玉瑱。乘輿郊祀。天地明堂享宗廟。元會臨軒。則服之。五等諸侯助祭。平冕九旒。青玉爲珠。有前無後。

各以其綬色爲組纓。旁垂黻纊。陳因之。以爲冕旒。皇太子朝冠遠遊冠。侍祭則平冕九旒。五等諸侯助祭郊廟。皆平冕九旒。青玉爲珠。有前無後。各以其綬色爲組纓。旁垂黻纊。北齊採陳之制。旒玉用五采。以組爲纓。色如其綬。其四時郊祀封禪大事。皆服衮冕。皇太子平冕。黑介幘。白珠九旒。飾以三采玉。以組爲纓。色如其綬。未加玄服。則空頂。黑介幘。雙童髻。雙玉導。後周設司服之官。掌皇帝十二冕。祀昊天則蒼冕。五帝各隨方色。朝日同青冕。夕月同素冕。地祇同黃冕。神州社稷同玄冕。享先皇加玄服。等以象冕。享先帝

食三老耕籍等以衮冕視朔大射等以山冕視朝臨
法門適宴等以鷩冕皆十有二旒諸公之冕九一曰
方冕二曰衮冕三曰山冕四曰鷩冕五曰火冕六曰
毳冕皆九旒七曰韋弁八曰皮弁九曰玄冠諸侯八
無衮冕諸伯七又無山冕諸子六又無鷩冕諸男五
又無火冕冕五旒三公之冕九一曰祀冕二曰火冕
三曰毳冕四曰藻冕五曰絺冕六曰爵弁七曰韋弁
八曰皮弁九曰玄冠三孤自祀冕而下八無火冕公
卿七又無毳冕上大夫六又無藻冕中大夫五又無
皮弁下大夫四又無爵弁士之服三一曰祀弁二曰

爵弁。三曰玄冠。庶士玄冠而已。隋採北齊之法。衮冕

垂白珠十二旒。以組爲纓。色如其綬。黹纁充耳。玉笄。

太子庶子。裴二奏。色並用玄。旒齊於膊。纁齊於耳。唯應著幘者。

依漢晉法。皇太子衮冕垂白珠九旒。青纁充耳。犀笄。

國公冕。青珠九旒。初受冊命。執贄入朝。祭祀親迎。三

公助祭。並服之。侯伯則鷩冕。子男則毳冕。五品以上

絺冕。九品以上爵弁。唐依周禮。制天子之六冕。有大

裘冕。衮冕。鷩冕。毳冕。絺冕。玄冕。大裘冕無旒。廣八寸。

長一尺六寸。玄表纁裏。以下廣狹准此。金飾玉簪導。簪亦謂之笄。所以拘冠使

不墜也。導以掠髮。使入巾幘之中。以組爲纓。色如其綬。祀天地神祇。

服之充冕

飾加金

垂白珠十有二旒以組爲纓色如其

綬黻纁充耳玉簪導諸祭祀及享廟遣上將征還飲

至加玄服元日受朝等服之鷩冕有事遠主服之按周

禮遠主謂先公

毳冕祭海嶽服之絺冕祭社稷帝社服之玄

冕蜡百神朝日夕月服之自衮冕而下旒數並依周

禮皇太子衮冕白珠九旒諸臣衮冕青珠九旒青纁

充耳簪導鷩冕七旒第二品服之毳冕五旒第三品

服之絺冕四旒第四品服之玄冕三旒第五品服之

龍朔以後改更不同

緇布冠

一曰進賢冠周制士冠禮云緇布冠以爲始冠之冠冠而敝之可也注云初加緇布冠次

如皮弁次加爵弁加皮弁後而棄之後漢制進賢冠
為儒者之服前高七寸後高三寸長八寸公侯三梁
中二千石以下至博士兩梁小吏私學弟子皆一梁
蔡邕云千石以下一梁晉因之天子玄服始加則冠
五梁進賢冠三公及封郡公縣侯鄉亭侯則三梁卿
大夫下至千石則兩梁中書門下至門郎小吏並一
梁宋因之為儒冠齊因之為開國公侯下至小吏之
服其以梁數為降殺則依晉制梁因之以為乘輿穿
會之服則五梁進賢冠陳因之為文散內外百官所
服以梁數為高卑天子所服則五梁比齊進賢五梁
冠不通于下隋因陳制內外文官通服之降殺一如
舊法唐因之若親王則加金附蟬為飾復依古制緇
布冠為始冠之冠進賢緇布二制存焉

牟追冠 夏后氏牟追冠長七寸高四寸廣五寸後廣
二寸制如覆杯前高廣後卑銳商因之制章

甫冠 高四寸半後廣四寸前擲首周因之制委貌冠
司服云凡甸冠弁服甸田獵也漢制委貌以阜繒為
之形如委殺之貌上小下大長七寸高四寸前高廣
後卑銳無笄有纓行大射禮於辟雍諸公卿大夫行

禮者冠之
宋依漢制

通天冠

通天冠本秦制其狀不傳漢因秦名制高九寸正豎頂少斜却乃直下為鐵卷梁前有山

展筩為述筩駁犀筩導乘輿所常服晉依漢制前加

金博山述注云述即鵠也鵠知天兩故冠像焉前有

展筩宋因之又加黑介幘舊有冠無幘齊因之東昏

侯改用玉簪導梁因之復加冕於其上為平天冕陳

因之比齊依之乘輿釋奠所服隋因之加金博山附

蟬十二首施珠翠黑介幘玉簪導朔日元會冬朝會

諸祭還則服之唐因

之其纓改以翠綬

長冠漢高帝採楚制長冠形如板以竹為裏亦名齊

日劉氏冠故為享廟之服恭之至也鄙人或謂之鵲
尾冠晉依之去竹用漆纒救日蝕諸祀則冠之梁天
監中祠部郎中沈宏議竹葉冠是漢祖徵時所服不
可為祭服宜改用爵弁司馬袞云若必遵三王則所
廢非一途矣

遠遊冠

有具楚制楚莊王通梁組纓似通天冠而無山

述有展簡橫之于前漢天子五梁太子三梁諸侯王

通服之晉皇太子及諸王後常冠焉以翠羽為綬綴

以白珠帝之兄弟之子封郡王者通服之則青絲為

綬梁為皇太子朝服加金博山翠綬陳因之其藻飾

服用依晉故事也北齊依之制五梁冠乘輿所服不

通于下隋制三梁加金附蟬九首施珠翠黑介幘翠

綬犀簪導皇太子元朔入朝釋奠則

服之唐因之其制具開元禮序例

高山冠 秦滅齊復其君冠以賜近臣因而制之形如
通天冠頂不斜却直植鐵為卷梁高九寸無
山展箭故亦名側注冠其體側立而曲注故也中外
謁者僕射行人使者等所服漢舊儀云乘輿冠高山
冠飛月之纓一云飛翮之纓通天子之服也魏明帝
以其制似通天遠遊故改令卑下除去卷箭如介幘
幘上加物以象山行人使者服之晉宋齊梁陳歷代
因之隋因魏制參用之形如進賢於冠加三峯謁者
大夫以下服之梁數依其品降殺唐因之
內侍省內謁者監及親王司閣等服之

法冠

秦滅楚復其君冠賜御史以繩為展筒鐵為柱

冠注云

解身神羊一角能別曲直楚王獲之以為冠

漢晉至陳

歷代相因襲不易隋開皇中於進賢冠上加二真珠為獬豸角形大業中改制一角注云獬豸

神獸蓋一角

今二角者非也執法者服之唐用一角

為獬豸之形

御史臺監察以上服之

建華冠

漢制以鐵為柱卷貫大銅珠九枚形似縷鹿

薛綜曰

下輪大上輪小也記曰知天者冠述

知天地者履絢

左氏傳曰鄭子戒好聚鵠冠建華是也

祠天地五郊明堂

舞人服之晉及陳代相因不易餘

並無

趙惠文冠

一名武冠秦滅趙以其君冠賜近臣胡廣

尾為貴職或以北土多寒胡人以貂皮溫額後代效

之亦曰惠文惠者聽也其冠文細如蟬翼故名惠文

或曰齊人見千歲涸澤之神名曰慶忌冠大冠乘小

車好疾馳因象其冠漢因之曰武弁一名大冠諸武

官冠之侍中中常侍加黃金璫附蟬為飾插以貂尾
 黃金為笄侍中中常侍加黃金璫附蟬為飾插以貂尾
 鷄冠倉頡解詁曰鷄鷄驚即翟山雞之屬尾彩鮮明
 是將飾冠以代貂焉幸臣闕儒為侍中皆服大冠天
 子元服亦為先加又加雙鷄尾植左右名鷄冠鷄鷺
 鳥之暴者每所攫撮應爪摧碎天子武騎故冠之徐
 廣曰鷄似黑野雞出上黨晉因之易齊因之侍臣加
 一名龍冠即惠文冠也宋因之不易齊因之侍臣加
 貂蟬餘軍校武職黃門散騎等皆冠之唯武騎虎賁
 插鷄尾於武冠上梁因制遠遊平上幘武冠陳因之
 不易後為鷄冠武者所服比齊依之曰武弁季秋講
 武出征告廟則服之隋亦名武弁武職及侍臣通服
 之侍臣加金璫附蟬以貂為飾侍左者左珥侍右者
 右珥天子則金博山三公以上玉枝四品以上金枝
 文官七品以上金附蟬三品以上玉枝四品以上金枝
 唐因之乘輿加金附蟬平巾幘侍中中書令則不加貂
 蟬侍左右珥諸武官府衛
 領軍九品以上等亦准此
 方山冠漢制似進賢冠以五采穀為之祠宗廟入侑
 四時五行樂人服之冠衣各如其方之色而

舞馬晉
因之

巧士冠

漢制高七寸。要後相通。直植似高山冠。不常服。唯郊天黃門從官者四人冠之。在鹵簿中。

次乘輿車前。以備宦者。四星云。晉因之。自後無聞。

却非冠

漢制似長冠。皆縮垂五寸。有纓綬。宮殿門吏僕射等冠之。梁北郊圖執事者縮纓綬。隋依

之門者禁防同。非服也。唐因之。亭長門僕服之。

樊噲冠

漢將樊噲造次所冠。以入項羽軍。其制似平冕。廣九寸。高七寸。前後各四寸。殿門司馬衛

士服之。或曰樊噲常持鐵楯。聞項羽有意殺漢王。噲裂裳以裹楯。冠之入軍門。立漢王傍。視項羽。晉宋齊

陳不易其制。餘並無聞。

術氏冠

漢制前圓差池四重。趙武靈王好服之。今不以施用。或曰楚莊王彌冠是也。晉因之。宋以

後無聞。

却敵冠

晉制前高四寸通長四寸後高三寸似進賢冠凡當殿門衛士服之陳依之餘並廢

翼善冠

唐貞觀中制月一日十五日視朝常服之又與平巾幘通用太宗初服翼善冠賜貴臣進

德冠

因謂侍臣曰幘頭起於周武帝蓋取便於軍容耳今四海無虞此冠頗採古法兼類幘頭乃宜常服

開元十七年廢不用

皇

有虞氏皇而祭其制無文蓋爵弁之類夏后氏因之曰收純黑前小後大商因之曰啤黑而微白前

大後小周因制爵弁爵弁冕之次也赤而微黑如爵頭然前小後大三代以來皆廣八寸長尺二寸如冕

無旒皆三十升布為之土冠禮三加成人服之漢依周制或云中古以下其制用絲祠天地五郊明堂雲

翹樂舞服之晉依漢制更名廣冕有收持笄服用如舊隋依之以角為簪導士助君祭服之唐因之以繒

代布用玄纓簪導九品以上冠親迎助祭私家祭祀服之

皮弁

周禮弁師云王之皮弁會五采玉藻象邱玉弁司服云視朝則皮弁服士冠禮曰三王共皮弁

以鹿皮爲之。晉依舊制，以鹿淺毛黃白色者爲之。其服用等級並准周官。後周田獵則服之，以鹿子皮爲之。隋因之，大業中所造，通用烏漆紗。前後二傍如蓮葉，四間空處又安拳花，頂上當縫安金梁，梁上加珠。天子十二真珠爲之，皇太子及一品九珠，二品八珠，下六品各殺其一。璪以玉爲之，皆犀簪導。六品以下無璪，皆象簪導。唯天子乃用金稜，後制鹿皮者以賜近臣。唐因之，以鹿皮爲之。玉簪導，十二璪，朔日受朝之服。

韋弁 周官司服云：凡兵事，韋弁服。晉以韋爲之，頂上少尖。宋因之，或爲車駕親戎，中外戒嚴之服。後

周巡兵，卽戎則服之。自此以來，無復其制。

幘 古者有冠，無幘。其戴也加首，有頰，所以安物。故詩曰：有頰者弁。此之謂也。秦雄諸侯，乃加其武將首

爲絳，袖以表貴賤。其後稍稍作顏題，相音盲，百切。漢

因續其顏，却探之。施巾連題，却覆之。至孝文，乃高其顏，題續之爲耳。崇其中爲屋，貴賤皆服之。文者長耳，謂之介幘。武者短耳，謂之平上幘。稱其冠也。尚書幘

收三寸名曰納言亦以忠正明近職也迎氣五郊各如其色從章服也武吏常赤幘成其威也未冠童子如無屋者示未成人也未入學小童幘勾卷屋者示尚幼小未遠冒也喪幘却摻反本禮也制紺幘以齋青幘以耕細幘以獵晉囚之東晉哀帝從博士曹洪等議立秋御讀月令改用素幘宋囚之以黑幘騎吏鼓吹武官服之其牧日蝕文武官皆冕冠著赤幘齊因之以黑幘拜陵所服深囚之以黑介幘爲朝服元正朝賀畢還儲更出所服未加玄服則空頂幘陳因之諸軍司馬服平巾幘長吏介幘黃鉞卽朝服赤介幘簪筆隋依之天子田獵御戎文官出遊田里武官自一品以下至九品并流外吏等上下通服黑介幘平巾黑幘又制緣幘庖人服之其平巾黑幘之制玉枝金花飾犀簪導紫羅帽其御五輅人隨其車色唐因制乘輿空頂介黑幘雙玉導加寶飾祭還及冬至朔日受朝會臨軒拜王公則服之黑介幘拜陵則服之平巾幘金寶飾導簪冠支皆以玉乘馬則駉之皇太子平巾幘乘馬則服之空頂介幘雙玉導加寶飾謁廟還宮元日冬至朔日入朝釋奠則服之冠幘五品以上陪祭服之

臣謹按蔡邕獨斷曰幘古之卑賤執事不冠者所服也。漢元帝額有壯髮不欲使人見始進幘服之。羣臣皆隨焉。然尚無巾。王莽頂禿幘上施屋壯髮謂當額前侵下而生者是。

幘魏武以天下凶荒資財乏匱擬古皮弁裁縑阜以爲幘苦洽反幘合乎簡易隨時之義以色別其貴賤本施軍飾非爲國容或云本未有岐荀文若巾之行觸木枝成岐因之爲名遂不改因通以慶弔幘與帟同晉因之咸和中制聽尚書入座丞郎門下三侍官乘車白幘齊依以素爲之舉哀臨喪服之梁因之以代古疑縑爲弔服羣臣舉哀臨喪則服之陳因之而初婚禮送餞則服之隋依梁不易唐因之
帽帽野人之服也董巴云上古穴居野處衣毛帽皮以帽此而言不施衣冠明矣周成王問周公曰舜之冠何如焉曰古之人上有帽而勾額魏管寧在家常著帛帽晉因魏制宋制黑帽綴紫標標以繒爲之長

四寸廣一寸。後制高屋白紗帽。齊因之。梁因之。陳因之。同。至於高下。翅之卷小異耳。皆以白紗為之。天子及士人通冠之。白紗者名高頂帽。皇太子在上。省則烏紗帽。在末福省則白紗。又有阜繒雜紗為之。高屋下裙。蓋無定準。後周之時。咸著突騎帽。如今胡帽。垂裙覆帶。蓋索髮之遺象也。又文帝項上瘤疾。不欲人見。每常著馬相魏之時。着而謁帝。故後周一代。以為雅服。小朝公宴。咸許戴之。隋開皇初。文帝常着烏紗帽。自朝貴已下。至于冗吏。通著入朝。後復制白紗高屋帽。其服練裙襦。烏皮履。宴接賓客。則服之大業中。令五品以上。通服朱紫。是以烏紗帽漸廢。貴賤通服。折上巾。唐因之。制白紗帽。又制烏紗帽。視朝聽訟。宴見賓客。服之。

臣謹按玄中記云。旬始作帽。晉志云。帽名猶冠也。義取於蒙覆其首。本纏也。古者冠無幘。冠下有纏。以繒為之後世。施幘於冠。因或裁纏為帽。自乘輿。

宴居下至庶人無爵者皆得服之。又按吳書云陸遜破曹休於石亭還當反西陵朝臣燕賜終日上脫裙帽以賜遜時同羣臣朝謁而服之。又按後漢郭林宗行遇雨露巾角折後周武帝建德中因制折上巾。

葛巾東晉制以葛爲之形如帽而橫著之爲尊卑共服太元中國子生見祭酒博士冠角巾齊依之陳依之北齊依之自後無聞

臣謹按角巾之制宋不存至齊立學王儉議更存焉。

幅巾後漢末王公名士以幅巾爲雅是以袁紹崔豹之徒雖爲將帥皆着縑巾時有妖賊以黃爲巾

時號黃巾賊後周武帝因裁幅巾為四脚唐因之

臣謹按方言云巾趙魏之間通謂之承露郭林宗折巾謂此也袁紹戰敗幅巾渡河按此則庶人及軍旅皆服之用全幅帛而向後襍髮謂之頭巾俗人謂之襍頭

巾子

唐武德初始用之初尚平頭小樣者天授二年武太后內宴賜羣臣高頭巾子呼為武家諸王

樣景龍四年三月太宗內宴賜宰臣以下內樣巾子其樣高而踏皇帝在藩時所冠人號為英王踏樣

君臣服章制度

袍附

虞書曰予欲觀古人之象日月星辰山龍華蟲作績宗彝藻火粉米黼黻絺繡備十二章

衣玄裳黃上六章在衣下六章

在裳上。夏商之世，皆相襲而無變。周官司服掌王之

吉凶衣服。大裘以祀天。大裘，黑羔裘，示質也。衮冕之服享先王。

升日月於旌旗，服備九章。一曰龍，二曰山，三曰華蟲，

四曰火，五曰宗彙，皆畫以爲績。六曰藻，七曰粉米，八

曰黼，九曰黻，皆絺以爲繡。則鷩冕之服享先公，鷩冕

之衣五章。裳四章。九章。鷩冕之服祀四望山川。鷩畫虎，雌謂

華蟲，其衣三章。絺冕之服祭社稷五祀。絺刺粉米，無畫，其

三章。裳四章。九章。玄冕之服祭群小祀。其衣無文，裳刺黻而已。凡兵

事韋弁服。以韠韋爲弁，又以爲衣裳。春秋傳曰：晉卻至衣韠韋之跗，注者是也。眡朝則

皮弁服。視內外朝之事，其服十五升白布衣，積素以爲裳。王受諸侯朝，覲於廟則衮冕。凡甸

冠弁服。甸田獵也。冠弁委貌。其服緇布衣，亦積素以爲裳。公之服自衮冕而

下如王之服。侯伯之服，自鷩冕而下。如公之服，子男之服，自毳冕而下。如侯伯之服，孤之服，自絺冕而下。如子男之服，卿大夫之服，自玄冕而下。如孤之服，士之服，自皮弁而下。如大夫之服，其齋服有玄端、素端。自公之衮冕至卿大夫之玄冕，皆其朝聘天子及助祭之服。諸侯非二王之後，其餘皆玄冕而祭於已。雜記曰：大夫冕而祭於公，弁而祭於已。士弁而祭於公，冠而祭於已。大夫爵弁自祭家廟，唯孤爾。其餘皆玄冠。與士同玄冠，自祭其廟者，其服朝服玄端。秦制水德，服尚衿黑。衿音均。後漢光武踐阼，始修郊祀。天子冕服，從歐陽氏說。三公九卿特進朝侯侍祠侯，從夏侯氏說。祀天地明堂，皆冠旒冕衣裳，皆玄上纁下，一服而已。明帝永平中議。

乘輿備文日月十二章刺繡文三公諸侯用山龍九章九卿以下用華蟲七章皆備五采大佩赤舄絢履以承大祭百官執事者冠長冠皆祗服五嶽四瀆山川宗廟社稷諸沾秩祠皆衿玄絳緣領袖爲中衣絳袴襪示其赤心奉神也其五郊迎氣衣幘袴襪各如方色云百官不執事者各服長冠衿玄以從大射禮於辟雍公卿諸侯大夫行禮者冠委貌衣玄端素裳鄭玄曰端取其正也鄭衆曰衣有襦裳者爲端執事者冠布弁衣緇麻衣阜領袖下素裳若冠通天冠服衣深衣制有袍隨五時色

梁劉昭曰袍者或曰周公袍成王宴居故施袍孔子衣縫掖之衣縫掖其袖合而縫大之近今袍者

也。今下至賤夫小吏皆通制袍。單衣皁綠領袖中衣爲朝服云。魏氏多因漢法其所

損益之制無聞。

按後漢志孝明皇帝永平二年詔從歐陽夏侯二家所說制冕服乘輿刺

繡文公卿以下織成文據晉志云魏明帝以公卿衮黼之服擬於至尊多所減損始制服刺繡公卿織成

未詳

就是。晉因不改大祭祀衣皁上絳下裳前三幅後四

幅衣畫而裳繡日月星辰凡十有二章素帶廣四寸

朱裏以朱綠裨飾其側中衣以絳綠領赤皮爲鞞絳

袴護赤舄未加玄服則皁紗袍絳緣中衣絳袴鞞黑

舄又朝服通天冠絳紗袍皁緣中衣拜陵則菱單衣

雜服有青赤黃白黑五色紗袍其武弁素服單衣公

卿助祭郊廟王公山龍以下九章卿華蟲以下七章

其緇布冠衣黑而裳素。中衣以阜綠領袖。袴褶之制未詳所起。其後車駕親戎。中外戒嚴。服無定色。冠黑帽。綴黑標。以繒爲之。長四尺。廣一寸。腰有絡帶。以代鞶革。中官紫標。外官絳標。又有纂嚴戎服。而不綴標。行留文武悉同。宋因之。制平天冕服。不易舊法。更名鞞曰蔽膝。其未加玄服。釋奠先聖視朝拜陵等服。及雜色紗裙。武冠素服。並沿舊不改。王公助祭郊廟。章服降殺亦如之。袴褶因晉不易。腰有絡帶。以代鞶革。中官紫標。外官絳標。又有纂嚴戎服。而不綴標。行留文武悉同。其田獵巡幸。惟從官戎服帶鞶革。文帝元

嘉中巡幸蒐狩救廟水火皆如之。明帝太始四年詔曰：近改定令，脩成六服。朕以大冕純玉璣，玄衣黃裳，祀天宗，祀明堂。又以法冕，玄衣絳裳，祀太廟。元正大會朝諸侯，又以飾冕，紫衣紅裳，小會宴饗，送諸侯臨軒。會王公，又以繡冕，朱衣裳，征伐講武，校獵。又以絃冕，青衣裳，耕稼饗國子。又以通天冠，朱紗袍，爲聽政之服。泰始六年正月，有司奏：被勅議皇太子正冬服，裘冕九章以朝賀。詔可。齊因制平天冠服，不易舊法。郊廟臨朝所服也。舊袞服用織成。建武中，明帝以織太重，乃采畫爲之，加金飾銀薄。時亦謂爲天衣。通天

冠服絳紗袍。皐綠中衣。乘輿臨朝所服。臣下皆同。拜陵則黑介幘。服無定色。舉哀臨喪。白帟單衣。亦謂之素服。王公助祭。平冕服。山龍以下九章。卿七章。皆畫皐絳繒爲之。袴褶相因不改。梁因制平天冠服。衣畫而裳繡十二章。素帶朱裏。以朱綠裨飾其側。更名赤鞞爲鞞。餘因舊法。又有通天冠服。絳紗袍。皐綠中衣。黑鳥。是爲朝服。元正賀畢。還儲更衣。出所服也。其釋奠先聖。則皐紗袍。絳綠中衣。絳袴鞞。黑鳥。拜陵則芟布單衣。又有白帟單衣。以代古之疑縗。天監三年。何佟之議。公卿以祭服裏有中衣。卽今中單也。後漢從

夏侯氏說祭服絳緣領袖爲中衣絳袴韞示其赤心奉神也。今中衣絳緣足有所明無俟於袴。旣非聖法謂不可施。遂依議除之。七年周捨議按禮有虞氏皇而祭深衣而養老。鄭玄云皇是畫鳳皇羽也。今衮衣宜畫鳳以示差降。帝曰古文日月星辰此以一辰攝三物也。山龍華蟲又以一山攝三物也。藻火粉米又以一藻攝三物也。是爲九章。今衮衣畫龍則宜畫鳳。又五經博士陸瑋等議王者祀昊天服大裘。鄭玄注司服云大裘黑羔裘也。旣無所出未爲可據。按六冕之服皆玄上纁下。今宜以繒爲之。其制式如裘。其裳

以纁皆無文繡。詔可。九年，司馬筠等議云：按玉藻，諸侯玄冕以祭，裨冕以朝。雜記又云：大夫冕而祭於公，弁而祭於己。今之尚書，上異公侯，下非卿士，止有朝衣，本無冕服。既從齋祭，不容同於在朝，宜依太常及博士諸齋官例，著白衣絳襪，中單，竹葉冠。陳因之。未定元年，武帝卽位，徐陵曰：乘輿御服，皆採梁制。帝曰：今天下初定，務從節儉，應用繡織成者，並可彩畫。至文帝天嘉初，悉改易之。後魏天興六年，詔有司始制冠冕，各依品秩，以示等差。然自晉左遷，中原禮儀多缺，未能皆得舊制。至太和中，方考故實，正定前繆，更

造衣冠尚不能周洽。及熙平二年。太傅清河王懌。黃
門侍郎韋延祥等奏定五時朝服。淮漢故事。五郊衣
幘各如方色焉。北齊因之。河清中改易舊物。著爲定
制。云後周設司服之官。掌皇帝十二服。祀昊天上帝。
則蒼衣蒼冕。五方上帝各隨方色。朝日用青衣青冕。
祭皇地祇用黃衣黃冕。夕月用素衣素冕。神州社稷。
用玄衣玄冕。享先皇加玄服。納后朝諸侯則用十二
章之服。享諸先帝。食三老五更。享諸侯。耕藉則用龍
以下九章之服。祀星辰。祭四望。視朔。大射。饗群臣等。
則用山冕八章之服。群祀。視朝。臨太學。入道法門。燕

射養庶老。適諸侯家。則用鷩冕七章之服。其九章以

下衣重衮山鷩裳重黼黻。俱十有二等。通以升龍為

領標。巡兵即戎。則韎韐以為衣裳。田獵則皮弁。謂以鹿子

皮為弁。白布衣而素裳也。諸公之服九章。服之章數皆

隨冕而降其一。其八章以下衣重藻粉米裳重黼黻。

俱九等。皆以山為領標。諸侯服八章而下。俱八等。皆

以華蟲為領標。諸伯服七章而下。俱七等。皆以火為

領標。諸子服六章。俱六等。皆以宗彝為領標。諸男服

五章。皆以藻為領標。三公之服有九章。有六衣。重宗

彝與藻裳重黼黻。俱為九等。皆以宗彝為領標。三孤

之服有八。章有五。衣重藻。與粉米。裳重黼黻。俱爲八等。公卿之服有七。章有四。衣重粉米。裳重黼黻。爲七等。皆以藻。火爲領標。上大夫之服有六。章有三。衣重粉米。裳重黼黻。爲六等。中大夫之服有五。章有三。衣重粉米。爲五等。下大夫之服有四。章有三。衣重粉米。爲四等。士之服三。則祀弁。爵弁。玄冠服。皆玄衣。其裳上士以玄。中士以黃。下士雜裳。謂前玄後黃庶士玄冠服。其在官府吏之屬。服緇衣裳。隋文帝卽位。將改後周制度。乃下詔曰。宣尼制法。損益可知。朕受天命。赤雀來儀。五德相生。宜爲火色。其郊丘廟社。可依袞冕之

儀朝會衣裳宜盡用赤。昔丹烏木運。周有大帛之旒。黃星土德。曹乘黑首之馬。今之戎服皆可尚黃。在外所著者。通用雜色。祭祀之服。須合禮經。宜集通儒。更可詳議。太子庶子攝太常少卿裴正奏曰。後魏以來。法度咸闕。天興草創。多參胡制。周氏因襲。不可以訓。今採東齊之法。乘輿衮冕。玄衣纁裳。衣山龍華蟲。火宗彝五章。裳藻粉米黼黻四章。衣重宗彝。裳重黼黻。爲十二等。衣標領織成升龍。白紗內單。黼黻領。青標。襪裾革帶。玉鈎釶。大帶素帶。朱裏紕。其外上以朱。下以綠。鞞隨裳色。龍火山三章。轆轤玉具。劔火珠鏢首。

白玉雙珮。玄組。雙大綬。六采。玄黃赤白。縹綠純玄。質長二丈四尺。五百首。廣一尺。小雙綬。長二丈六寸。色同大綬。而首半之間。施三玉環。朱鞮。赤舄。舄加金飾。祀圓丘。方澤。五帝明堂。五郊。雩禘。封禪。朝日。夕月。宗廟。社稷。籍田。遣上將。征還。飲至。玄服。納后。正月受朝。及臨軒。拜玉公。則服之。通天冠。加金博山。附蟬十二。首施珠翠。黑介幘。玉簪導。絳紗袍。深衣制。白紗內單。阜領標。襪裾。絳紗蔽膝。白假帶。方心。曲領。其革帶。劔珮。綬舄。與上同。黑介幘。白紗單衣。烏皮履。拜陵。則服之。白紗帽。白練裙襦。烏皮履。視朝聽訟。及宴見賓客。

皆服之。白恰。白紗單衣。烏皮履。舉哀則服之。皇太子
衮冕。玄衣纁裳。衣山龍華蟲。火宗彝五章。裳藻黼黻
粉米四章。織成爲之。白紗內單。黼領。青褌。襪。裾。革帶
金鈎。釧。大帶。素帶。不朱裏。亦紕。以朱綠。鞞。隨裳色。火
山二章。玉具。劔。火珠。鏢首。瑜玉雙佩。朱組。雙大綬。四
采赤白。縹。緋。純。朱質。長丈八尺。三百二十首。廣九寸。
小雙綬。長二尺六寸。色同大綬。而首半之。間施二玉
環。朱鞮。赤舄。舄以金飾。侍從皇帝祭祀。及謁廟。加玄
服。納妃則服之。遠遊三梁冠。加金。附蟬九首。施珠翠。
黑介幘。犀簪。導絳紗袍。白紗內單。阜領。褌。襪。裾。白假

帶方心曲領絳紗蔽膝韞舄其革帶劔珮綬與上同
謁廟還宮元日朔日入朝釋奠則服之遠遊冠公服
絳紗單衣革帶金鈎釧假帶方心紛長六尺四寸廣
二寸四分色同其綬金縷鞶囊韞履五日常朝則服
之衮冕服九章同皇太子王國公開國公初受冊執
贄入朝祭祀親迎則服之三公助祭者亦服之鷩冕
服七章衣華蟲火宗彝三章裳藻粉米黼黻四章侯
伯初受冊執贄入朝祭祀親迎則服之毳冕五章衣
宗彝藻粉米三章裳黼黻二章子男初受冊執贄入
朝祭祀親迎則服之絺冕服三章正三品以下從五

品以上助祭則服之。自王公以下服章皆繡爲之。祭

服冕皆簪導。青纊充耳。玄衣纁裳。白紗內單。黼領。纁

以下內單青襟。襪。革帶。鈎鑿。大帶。王三公及公侯伯

單青領皆純其外。上以朱。下以綠。正三品以下。從五品。朱鞞。

以上素帶純其垂外以玄內以黃鈎皆用青組九鼓。皆隨裳色。衮鶯毳。劍佩。綬。鞞。赤舄。爵弁。從九品。

以上助祭則服之。玄衣纁裳。無章。白絹內單。青領。襟。

襪。革帶。大帶。武弁。平巾幘。諸武職及侍臣通服之。

侍臣加金璫附蟬。以貂爲飾。侍左者左珥。侍右者右

珥。委貌冠。未冠則雙童髻。空頂。黑介幘。皆深衣。青領。

烏皮履。國子太學四門生服之。朝服。亦名具服絳紗單衣。

白紗內單。阜領袖。阜襪。革帶鈎鑠。假帶曲領方心。絳紗蔽膝。韞舄。綬劔珮。從五品以上。陪祭朝饗拜表。凡大事則服之。六品以下。從七品以上。去劔珮。綬餘並同。自餘公事皆從公服。亦名從省服唐制天子衣服有大裘衮冕。鷩冕。毳冕。絺冕。玄冕。通天冠。武弁。黑介幘。白紗帽。平巾幘。白恰。凡十二等。貞觀四年制。三品以上服紫。四品五品以上服緋。六品七品以上綠。八品九品以上青。婦人從夫之色。仍通服黃。

后妃命婦首飾制度

周制追師掌王后之首服。爲副。編次。追衡。笄。爲九嬪。

及外內命婦之首服以待祭祀賓客鄭玄謂副之言覆所以覆首為

之飾其遺象若今步搖編編髮為之其遺象若今假

給矣次次第髮長短為之所謂髮髻也追循治也王

后之衡笄皆以玉為之唯祭服有衡垂于

副之兩旁當耳其下以纒垂瑱并卷髮者漢制太皇

太后皇太后入廟剪鬖菌簪珥珥耳璫垂珠也簪以瑋瑁為

擿長一尺端為華勝上為鳳皇爵以翡翠為毛羽下

有白珠垂黃金鑷左右一橫簪之以安菌諸簪珥皆

同制其擿有等級焉皇后謁廟假髻步搖俗謂之珠

松是也簪珥步搖以黃金為山題貫白珠為枝相繆

入爵九華熊虎赤羆天鹿辟邪南山豐大特六獸詩

所謂副笄六珈珈笄飾之最盛者所以別尊卑者也

南山豐大特按史記秦文公二十七

年伐南山大梓豐大特徐廣注云今武都故道有怒特祠圖大牛上生木本有牛從木中出後見於豐水中諸爵獸皆以翡翠爲毛羽金題白珠璫繞以翡翠爲華云貴人助蠶大手髻黑瑋琯又加簪珥長公主加步搖公主大手髻皆有簪珥公卿列侯中二千石二千石夫人紺繒齒黃金龍首銜白珠魚須擿長一尺爲簪珥魏制貴人夫人以下助蠶皆大手髻七鑊奠蔽髻黑瑋琯又加簪珥九嬪以下五鑊世婦三鑊諸王妃長公主大手髻七鑊蔽髻其長公主得有步搖皆有簪珥公特進列侯卿校世婦以下夫人紺繒齒黃金龍首銜白珠魚須擿長一尺爲簪珥晉依前

代皇后首飾。則髻步搖簪珥。步搖以黃金爲山題。貫白珠爲枝相繆。八爵九華。熊虎赤熊。天鹿辟邪。南山豐大特六獸。諸爵獸皆以翡翠爲毛羽。金題白珠璫。繞以翡翠爲華。宋依漢制。太后入廟祭祀。首飾翦鬋。漢皇后親蠶。首飾假髻步搖。入雀九華。加以翡翠。復依晉法。皇后十二鑊。步搖大手髻。公主會見三夫人。大手髻七鑊。蔽髻。公夫人五鑊。世婦三鑊。其長公主得有步搖。公特進列侯夫人二千石命婦。年長者。紺繒。齊因之。公主會見大手髻。不易舊法。陳依前制。皇后謁廟。首飾假髻步搖簪珥。步搖以黃金爲山題。

貫白珠爲枝相繆八爵九華熊虎赤羆天鹿辟邪南山豐大特六獸諸爵獸皆以翡翠爲華開國公侯太夫人夫人大手髻七鎖蔽髻九嬪及公夫人五鎖世婦三鎖其長公主得有步搖公特進列侯卿校中二千石夫人紺繒齒黃金龍首銜白珠魚須擿長一尺爲簪珥後魏天興六年詔有司始制冠冕各依品秩以示等差然未能皆得舊法北齊依前制皇后首飾假髻步搖十二鎖八爵九華內命婦以上蔽髻唯以鎖數花釵多少爲品秩二品以上金玉飾三品以下金飾內命婦左右昭儀三夫人視一品假髻九鎖三

品五鑲蔽髻。四品三鑲。五品一鑲。又有官人女官。第二品七鑲蔽髻。三品五鑲。四品三鑲。五品一鑲。七品大手髻。八品偏髻髻。皇太子妃假髻步搖。九鑲。郡長公主七鑲蔽髻。太子良娣視九嬪。女侍中五鑲。內外命婦。宮人女官從蠶。則各依品次。還著蔽髻。後周制。皇后首飾。花釵十有二樹。諸侯之夫人亦皆以命數爲之節。三妃三公夫人以下。又各依其命。一命再命者。又俱以三爲節。隋因之。皇后首飾。花十二樹。皇太子妃。公主。王妃。三師。三公夫人。一品命婦。並九樹。侯夫人。二品命婦。並八樹。伯夫人。三品命婦。並七樹。子

夫人世婦及皇太子昭訓四品以上命婦並六樹男
 夫人五品命婦並五樹女御及皇太子良娣三樹皇
 后以下小花並
 如大花之形唐武德中制令皇后禕衣首飾花釵
 十二樹餘各有差開元中又定品令

后妃命婦服章制度

周制內司服掌王后之六服禕衣揄翟闕翟鞠衣展
 衣祿衣素沙王后之服刻繒為之形而采畫之綴於
 衣以爲文章禕衣畫翬者揄翟畫搖者
 闕翟刻而不畫此三者皆祭服從王祭先王則服禕
 衣祭先公則服揄翟祭羣小祀則服闕翟今世有桂
 衣者蓋三翟之遺俗鞠衣黃桑服也色如麴塵象桑
 葉始生月令三月薦鞠衣于上帝告桑事展當爲檀
 檀衣以禮見王及賓客之服其色白祿衣御於王之
 服亦以燕居其色黑六服備於此矣以下推次其色

則闕翟赤。榆翟青。禕衣玄。此鄭據五行相生爲說也。素沙者。今之白縹也。六服皆袍制。以白縹爲裏。使之張顯。今世有沙穀者。名出於此。其辨內外命婦之服。翟多少。各依命數。榆音搖。縹音緇。辨內外命婦之服。鞠衣。展衣。祿衣。素沙。內命婦之服。鞠衣。九嬪也。展衣。其夫孤也。則服鞠衣。其夫卿大夫也。則服展衣。其夫士也。則服祿衣。三夫人及公之妻。並闕翟。以下至侯伯之夫人。榆翟。子男之夫人。亦闕翟。唯二王後禕衣也。漢制。太皇太后。皇太后。皇后入廟服。紺上。皐下。蠶服。青上。縹下。皆深衣制。徐廣曰。卽單衣也。縹音足。繞反。隱頰袖緣以條。貴人助蠶服。純縹上下。長公主見會。自公主封君以上。皆帶綬。以采組爲緄。帶各如其綬色。黃金辟邪首爲帶鏞。飾以白珠。公卿列侯中二千石夫人入廟。佐祭者服。皐。緇上下。助蠶。

者。縹。緗。上下。自二千石夫人以上。至皇后。皆以蠶衣。爲朝服。公主。貴人。妃以上。嫁娶。則服錦綺羅縠。繒。采。十二色。重祿袍。特進。列侯以上。錦繒。采。十二色。六百石以上。重練。采。九色。禁丹。紫。紺。三百石以上。五采。青。絳。黃。紅。綠。二百石以上。四采。青。黃。紅。綠。賈人。緡。縹。而已。細赤。魏之服制。不依古法。多以文繡。晉依前漢制。皇后謁廟服。早上縹。下隱。領袖緣。元康六年。詔以純青服。貴人。夫人。貴嬪。是爲三夫人。皆金章紫綬。九嬪。銀印。青綬。佩采。瓊玉。助蠶之服。純縹。爲上下。皇太子。妃。金璽。龜鈕。纁朱綬。佩瑜玉。諸王。太妃。諸長公主。金。

印紫綬。佩山玄玉。自公主以上，皆帶綬。以綵組爲緄帶。各如其綬色。金辟邪首爲帶玦。郡縣公侯夫人，銀印青綬。水蒼玉。公特進、列卿、世婦、中二千石、夫人入廟助祭者，皁綃上下。助蠶者，緇綃上下。自二千石以上至皇后，皆以蠶衣爲朝服。宋制，太后、皇后入廟服，袿褕。上袿，下屬。大衣，謂之禕衣。公主會見，封君以上，皆帶綬。以采爲緄帶。各如綬色。公特進、列侯、夫人、卿、校、世婦、二千石、命婦、年長者，入廟佐祭。皁綃上下。助蠶，則青綃上下。自皇后至二千石、命婦，皆以蠶衣爲朝服。

按漢劉向曰：古者天子至于土，王后至于命婦，必佩玉。尊卑各有其制。皇后至命婦，所佩玉古制不存。今

與外制齊因之。袿褱用繡爲衣裳。黃綬貴嬪。夫人。貴人。

王大妃。長公主。封君。皆紫綬。六宮。郡公。侯。夫人。青綬。

陳依前制。皇后謁廟。袿褱大衣。阜上阜下。親蠶。則青

上縹下。隱領袖緣。貴妃嬪。金章龜鈕。紫綬。佩于闐玉。

獸頭鞶。九嬪以下。章綬。佩帶各有差。自公主。封君。以

上。皆帶綬。以綵組爲緹帶。各以其綬色。金辟邪首爲

帶玦。自二千石以上。至皇后。皆以蠶衣爲朝服。北齊

皇后助祭。朝會以褱衣。祠郊禘。以揄翟。小宴以闕翟。

親蠶。以鞠衣。禮見皇帝。以展衣。宴居。以祿衣。六服俱

有蔽膝。織成緹帶。內外命婦。從五品以上。金章紫綬。

服揄翟。雙佩山玄玉。九嬪視三品。銀章青綬。鞠衣。佩水蒼玉。其餘各有差。餘與女侍中同。外命婦皆如其夫。若夫假章印綬佩。妻則不假。一品二品服闕翟。三品服鞠衣。四品展衣。五品祿衣。內外命婦。宮人從。皆則各依品次。皆服青紗公服。其外命婦。綬帶鞶囊。皆准其夫公服之例。百官之母。詔加太夫人者。朝服公服。各與其命婦服同。後周制。皇后之服。十有二等。其翟衣六。從皇帝祀郊禘。享先皇。朝皇太后。則服翬衣。祭陰社。朝命婦。則服揄衣。祭群小祀。受獻繭。則服鷩衣。採桑。則服鳩衣。黃色。音卜。從皇帝見賓客。聽女教。則服

鷩衣

白色音單

食命婦歸寧則服翬衣

玄色音秩

俱十有二等

以翬翟爲領標各有二臨婦學及法道門燕命婦則

蒼衣春齋及祭還則青衣夏齋及祭還則朱衣採桑

齋及祭還則黃衣秋齋及祭還則素衣冬齋及祭還

則玄衣自青而下其標領以相生之色諸公夫人自

揄衣以下鷩鷩朱黃素玄等衣而九諸侯夫人

自鷩衣而下八諸伯夫人自鷩衣而下七諸子夫人

自鷩衣而下六諸男夫人自翬衣而下五其翟衣翟

皆依其等數而領標各有差三妃三公夫人之服九

鷩衣鷩衣翬衣青衣朱衣黃衣素衣玄衣緇衣其翟

亦九等。以鳩翟爲領標。各九。三孤之內子。自鷩衣而下八。翟皆八等。以鷩翟爲領標。各八。九嬪六卿之內子。自翊衣而下七。翟皆七等。以翊翟爲領標。各七。上媛。上大夫之孺人。自責衣而下六。中媛。中大夫之孺人。自黃衣而下四。御。婉士之婦。自素衣而下三。中官。六尚。緌子侯反衣。諸命秩之服。曰公服。其餘常服。曰私衣。隋制。皇后禕衣。鞠衣。青衣。朱衣。四等。禕衣。深青質。織成。領袖文。以翬翟。五采。重行十二等。素紗內單。黼領。羅縠。襍。襪。色。皆以朱。蔽膝。隨裳色。以緌爲緣。用翟三章。大帶。隨衣裳飾。以朱緣之。革帶。青鞵。舄。舄以金。

飾白玉佩。玄組綬。章采尺寸。同於乘輿。祭及朝會大事服之。鞠衣黃。羅爲質。織成領袖。蔽膝革帶。及舄。隨衣色。餘准禕衣。親蠶服也。青衣去大帶。及珮綬。金飾履禮。見天子則服之。朱服如青服。有金璽盤。螭鈕文。曰皇后之璽。冬至大朝。則并璜琮。各以筭貯。進於座隅。皇太后同於后服。而貴妃以下。並亦給印。三妃服揄翟。金章龜鈕。文從其職。紫綬。金縷獸頭鞶囊。佩于闐玉。九嬪服闕翟。金章龜鈕。文從其職。佩采璫玉。姪好銀鏤織成。他如嬪服。美人才人。鞠衣銀印。珪鈕。獸瓜鞶囊。佩水蒼玉。寶林服展衣。艾綬鞶囊。珮玉同。媼

好承衣。刀人采女皆祿衣。無印綬。皇太子妃服揄翟衣。九章。金璽龜鈕。素紗內單。黼領。羅標襪。色皆用朱。蔽膝。二章。大帶同禕衣。青緣。革帶。朱鞮。青舄。舄加金飾。佩瑜玉。纁朱綬。獸頭鞶囊。凡大禮見皆服之。唯侍親桑。則用鞠衣。珮綬與揄衣同。良娣鞠衣。銀印。青綬。獸爪鞶囊。餘同世婦。寶林八子。展衣。銅印。佩水蒼玉。艾綬。諸王太妃。妃。長公主。三公夫人。一品命婦。揄翟。繡爲九章。佩山玄玉。獸頭鞶囊。綬同夫色。公夫人。縣主。二品命婦。亦揄翟。繡八章。從親桑。同鞠衣。自此以下。珮皆水蒼玉。侯伯夫人。三品命婦。亦服揄翟。繡爲

七章。子夫人四品命婦服闕翟刻赤繒爲翟。綴衣上爲六章。男夫人五品命婦闕翟五章。若從親蠶皆同。鞠衣。唐武德令皇后服有褱衣。鞠衣。鈿釵禮衣三等。皇太子妃揄翟鞠衣。自皇后至內外命婦衣服制度並具開元禮。

天子諸侯玉佩劔綬璽印

周制。天子佩白玉而玄組綬。公侯佩山玄玉而朱組綬。大夫佩水蒼玉而緇組綬。世子佩瑜玉而綦組綬。士佩瑀。玨而緇組綬。綬者所以貫佩玉。綦雜色。緇赤黃色。玉鎮圭長尺有二寸。大圭長三尺。杆上終葵首。終葵椎也。爲椎於其杆上。杆殺。

也。纁藉五采五就。以朝日。公執桓圭九寸。侯執信圭。

伯執躬圭。皆七寸。纁皆三采三就。子執穀璧。男執蒲。

璧。纁皆二采再就。以朝覲宗。遇會同于王。三采朱白蒼二采朱

也。凡玉。天子用全。上公用龍。侯用瓚。伯用將。皆龍瓚將。

自五霸迭興。戰兵不息。佩非戰器。鞞非兵旗。於是解。

去綬。佩留其係。璲以爲章表。鞞珮遂廢。又三代之制。

人臣皆以金玉爲印。龍虎鈕。唯所好也。秦始制璽。以。

玉不通。臣下用制乘輿六璽。曰皇帝行璽。皇帝之璽。

皇帝信璽。天子行璽。天子之璽。天子信璽。又始皇得。

藍田白玉爲璽。螭虎鈕。文曰受天之命。皇帝壽昌。鞞。

珮既廢，乃以采組連結於璲。光明章表，轉相結受。故謂之綬。漢高帝入關，得秦始皇白玉璽，佩之。曰：傳國璽。與斬蛇劍俱爲乘輿之寶。鞞承秦制，用而弗改。加以雙印佩刀。後漢孝明帝乃爲大佩，衝牙、雙瑣、瑠璃，皆以白玉。月令章句曰：佩上有雙珩，下有雙瑣。瑠璃所以納珠，在玉之間。今白珠也。乘輿落以白珠。公卿諸侯以采絲，其視冕旒爲祭服云。佩刀，乘輿黃金通身貂錯，半鮫魚鱗，金漆錯。雌黃室，五色罽，隱華室。諸侯王黃金錯環，挾半鮫黑室。公卿百官皆淳黑，不半鮫。小黃門雌黃室，中黃門朱室，童子皆虎爪文。虎賁黃室，虎文。其將

白虎文皆以白珠爲鏢口之飾。

刀鋒曰鏢
匹燒反

乘輿者加

翡翠山紆嬰其側佩雙印長寸二分方六分乘輿諸

侯王公列侯以白玉中二千石以下至四百石皆以

黑犀三百石以至私學弟子皆以象牙上合絲乘輿

以騰貫白珠赤屬鞮諸侯王以下繇

口故反

赤絲鞮。滕

繇各如其印質刻書文曰正月剛卯既決靈及四方

赤青白黃四色是當帝令祝融以教夔龍庶疫剛瘳

莫我敢當疾日嚴卯帝令夔龍慎爾周伏化茲靈及

既決既直既觚既方庶疫剛瘳莫我敢當

前漢注云
以正月卯

日乘輿黃赤綬四采黃赤紺縹淳黃圭長丈九尺九

寸五百首

凡綬先合單紡為一絲四系為一扶五扶為一首五首成一文采純為一圭首多者

系細首少者系麤漢官儀曰璽皆白玉螭虎鈕文曰皇帝行璽皇帝之璽皇帝信璽天子行璽天子之璽

天子信璽凡六璽皇帝行璽封常行詔勅之璽賜諸侯王書信璽發兵召大臣天子行璽策拜外國事之

璽賜外國書信璽發外國兵及事天地鬼神璽皆以武都紫泥封青布囊白素裏兩端無縫尺一版中約

晉皇帝帶綬黃地六采不佩璽璽以金銀勝組侍中組負以從秦前民皆佩綬以金玉銀銅犀象為方寸

璽各服所好奉璽書使者乘馳傳其驛騎也三騎行晝夜千里為程諸侯王赤綬四采

赤黃縹紺淳赤圭長二丈一尺三百首太皇太后皇

太后皇后其綬皆與乘輿同長公主天子貴人與諸

侯王同綬者加特也諸國貴人相國皆綠綬三采綠

紫紺淳綠圭長二丈一尺二百四十首

前漢書曰相國丞相皆秦

官金印紫綬高帝相國綠綬徐廣曰金印綠綬音戾
草名以染似綠又云似紫紫綬名縹音瓜其色青紫
公加殊禮
皆得服之
公侯將軍紫綬二采紫白淳紫圭長丈

七尺百八十首前漢書曰太尉金印紫綬御史大夫位上卿銀印青綬成帝更名大司空

金印紫綬將軍亦金印漢官儀曰馬防為車騎將軍銀印青綬在卿上絕席和帝以竇憲為車騎將軍始

加金紫次司空九卿中二千石青綬三采青白紅淳青圭長

丈七尺百二十首一號青縹綬自青綬以上音逆皆長三

尺二寸與綬同采而首半之綬者古佩璲也佩綬相

迎受故曰緹紫綬以上緹綬之間得施玉環鐻云俗通

文曰缺環曰鐻漢舊儀曰其斷獄者印為章也千石六百石黑綬三采青赤

緹淳青圭長丈六尺八十首四百石三百石長同漢官

儀曰尚書僕射銅印青綬

四百石三百石二百石黃綬淳黃圭一

采長丈五尺六十首自黑綬以下。纒綬皆長三尺與

綬同采而首半之百石青紺綸一采宛轉繆織長丈

二尺晉制盛服則雜寶爲佩金銀校飾綬黃赤縹紺

四采太子諸王纁朱綬赤黃縹紺相國綠綬綬三采

綠紫紺郡公朱侯伯青朱子男素朱皆三采公嗣子

紫侯嗣子青鄉亭關內侯紫綬白二采郡國太守內

史青尚書令僕射中書監令秘書監皆黑丞皆黃諸

府丞亦然其佩刀者以木代真刀也宋皇太子金璽

龜鈕朱綬四采赤黃縹紺佩瑜玉諸王金璽龜鈕纁

朱綬四采赤黃縹紺佩山玄玉太宰太傅太保丞相
司徒司空金章紫綬佩山玄玉相國則綠綬綬三采
綠紫紺自相國而下或銅印銀章或青綬或黑綬以
至別部司馬以下假黑綬者凡六十等各有差凡此
職江左多不備又多闕朝服諸應給朝服佩玉而在
京師者給朝服非諸鳥丸羌戎蠻諸校尉以上及刺
史西域戊巳校尉皆不給佩玉其來朝會權時假給
會罷翰還凡應朝服者而官不給聽自具之諸假印
綬而官不給鞶囊者得自具作其位假綬者不得佩
綬革古制也按漢代著鞶囊者側在腰間或云傍囊
或云綬囊然則以此囊盛
綬也或盛或散各有其時齊乘輿制六璽以金爲之
並依秦漢之制皇太子諸王金璽皆龜鈕公侯五等
金章其公將軍金章光祿大夫卿尹太子傅諸領護

將軍中郎將校尉郡國太守內史四品五品將軍皆
銀章尚書令僕射中書監令秘書監丞太子二率諸
府長史卿尹丞尉都水使者諸州刺史皆銅印其綬
乘輿黃赤縹紺四采太子諸王纁朱綬赤黃縹紺色
亦同相國綠綬綬三采綠紫紺羣公朱侯伯青子男
素朱皆三采公嗣子紫侯嗣子青鄉亭侯關中關內
侯紫綬皆二采郡國太守內史青尚書僕射中書監
令秘書監皆黑丞皆黃諸府丞亦然梁制乘輿印璽
並如齊制皇太子金璽龜鈕朱綬三百首佩瑜玉帶
鹿盧劔火珠首素革帶玉劔獸頭鞞囊諸王金璽龜

鈕。纁朱綬百六十首。佩山玄玉。垂組大帶。獸頭盤。腰
劔。若加餘官。則服其加官之服。開國公。金章龜鈕。玄
朱綬百四十首。佩山玄玉。獸頭盤。腰劔。自開國公而
下。或金章。或金印。或銀章。或銀印。或銅印。或青綬。或
紫綬。或墨綬。或黃綬。或艾綬。或佩水蒼玉。或佩五采
或無佩。而簪筆者。或獸頭盤。或獸爪盤。或腰劔。或紫
荷執笏。或赤舄絢履。或毼縠單衣。介幘。以至四品將
兵以下。所領不滿五十人。除版而不給章者。凡七十
等。各有差。陳永定元年。武帝所定乘輿服御。皆採梁
舊制。以天下初定。務從節儉。應用繡織成者。並可彩

畫珠玉之飾。任用時也。至天嘉初，悉改易之。令一依

梁天監舊事。北齊制。天子六璽。並依舊式。

皇帝行璽之璽。信璽。

並白玉爲之。方一寸三分。天子行璽。又有傳國璽。白

之璽。信璽。並黃金爲之。方一寸二分。玉爲之。方四寸。螭獸鈕。上交蟠螭隱起。鳥篆書。文曰。

受天之命。皇帝壽昌。凡八字。在六璽外。唯封禪以封

石函。又有督攝萬機印一鈕。以木爲之。長尺二寸。廣

二寸五分。背上爲鼻鈕。鈕長九寸。厚一寸。廣七分。腹

下隱起篆文書。爲督攝萬機凡四字。此印常在內。唯

以印籍縫用。則左戶部郎中度支尚書奏取印訖。轉

內。皇太子爾。黃金爲之。方一寸。龜鈕。文曰皇太子璽。

宮中大事用璽。小事用門下典書坊印。諸侯印綬。二品以上。並金章紫綬。三品銀章青綬。四品得印者。銀印青綬。五品六品得印者。銅印墨綬。七品八品九品得印者。銅印黃綬。金銀章印。及銅印。並方一寸。皆龜鈕。東西南北四藩諸國王之章。上藩用中金。中藩用下金。下藩用銀。並方寸。龜鈕。佐官唯公府長史尚書。二丞給印綬。六品以下。九品以上。唯當曹爲官長者。給印。餘自非長官。雖位尊。亦不給。諸王纁朱綬。四采。赤黃纁。紺純朱質。纁文織。長二丈一尺。二百四十首。廣九寸。開國郡縣公。散郡公。玄朱綬。四采。玄赤纁。紺。

朱質玄文織長丈八尺百八十首廣八寸開國縣侯
伯青朱綬四采青赤白縹朱質青文織長丈六尺百
四十首廣七寸開國縣子男名號侯開國鄉男素朱
綬三采青赤白朱質白文織長丈四尺百二十首廣
六寸一品二品紫綬三采紫黃赤純紫質長丈八尺
百八十首廣八寸三品四品青綬三采青白紅純青
質長丈六尺百四十首廣七寸五品六品墨綬二采
青紺純紺質長丈四尺一百首廣六寸七品八品九
品黃綬二采黃白純黃質長丈二尺六十首廣五寸
官品從第二以上小綬間得施玉環官有綬者則有

紛皆長八尺廣三寸各隨綬色若服朝服則佩綬公服則佩紛官無綬者不給佩紛其鞶囊二品以上金縷三品金銀縷四品銀縷五品六品綵縷七八九品絲縷獸爪鞶官無印綬者並不給佩鞶囊及爪其佩及劔一品玉具劔佩山玄玉二品金裝劔佩水蒼玉三品及開國子男五等散品名號侯雖四品五品並銀裝劔佩水蒼玉侍中以下通直郎以上陪位則象劔木劔也言其象真帶劔者入宗廟及升殿若在仗內皆解劔後周皇帝八璽有神璽有傳國璽皆寶而不用神璽明受之於天傳國璽明受之於運皇帝負展則置神璽於筵前之右

置傳國璽於筵前之左。其六璽並因舊制。皆白玉爲之。方一寸五分。高一寸。螭獸鈕。三公諸侯皆金印。方一寸二分。高八分。龜鈕。七命以上銀。四命以上銅。皆龜鈕。三命以下銅。印銅鼻。其方皆寸。其高六分。文曰某公官之印。凡組綬。皇帝以蒼。青。朱。黃。白。玄。纁。紅。紫。緗。碧。綠。十有二色。諸公九色。白。黃。以下。諸侯八色。白以下。諸伯七色。自玄以下。諸子六色。自纁以下。諸男五色。自紅以下。三公之綬如諸公。三孤之綬如諸侯。六卿之綬如諸伯。上大夫之綬如諸子。中大夫之綬自紫以下。士之綬自緗以下。其璽印綬亦如之。保

定四年百官始執笏常服焉。內外命婦皆執笏。其拜俛伏方興。宇文護始袍加下欄。遂爲後制。隋制神璽寶而不用。受命璽封禪則用之。餘六璽行用。並因舊制。其綬自王公侯伯子男爲四等。又以從正一品三品四品五品亦爲四等之差。大抵遵北齊之制。采純及首微有加減焉。自王公以下皆有小雙綬。長二尺六寸。色同大綬。而首半之。正從一品施二玉環。以下不合有綬者。則有紛。皆長六尺四寸。廣二寸四分。各隨綬色。其鞶囊如北齊制。其佩一品及五等諸侯並山玄玉。五品以上水蒼玉。唐貞觀十六年太宗刻受

命玄璽白玉爲螭首其文曰皇天景命有德者昌。未
徽二年四月勅開府儀同三司及京官文武職事四
品五品並給隨身魚。上元元年八月勅文武官三品
以上金玉帶十二勝。四品金魚帶十一勝。五品金帶
十勝。六品七品並銀帶九勝。八品九品服並鍮石帶。
八勝。庶人服黃銅鐵帶六勝。其一品以下文官並帶
武官欲帶手巾
筆袋亦聽之武太后天授元年九月改內外官所
授魚爲龜。至神龍元年二月京文武官五品以上依
舊式佩魚袋垂拱二年正月赦文諸州都督刺史並
准京官帶魚長壽三年改玉璽爲符寶開元二年七

月勅珠玉錦繡既令禁斷准式三品以上飾以玉四

品以上飾以金五品以上飾以銀者宜於腰帶及馬

鐙酒杯杓依式自外悉禁斷天授二年八月左羽林大將軍建昌王攸寧借

紫衫金帶借紫自此始八年二月敕都督刺史品卑者借緋及

魚袋未為常式天寶十載改傳國寶為承天大寶天

子之寶八一曰神寶所以臣百王鎮二曰受命寶所以

修封禪禮神祇三曰皇帝行寶答疏於王四曰皇帝之寶勞

勳賢則五曰皇帝信寶召大臣六曰天子行寶答四

則用七曰天子之寶慰撫蠻夷八曰天子信寶發蕃

則用凡大朝會則奉寶以進于御座車駕行幸則奉

寶以從于黃鉞車之內。

臣謹按。梁制左右光祿大夫加金章紫綬。銀章青綬者。同其位。但加金紫者。謂之金紫光祿大夫。但加銀青者。謂之銀青光祿大夫。又按北齊之制。三品以上。凡是五省官及中侍中省官。皆爲印。不爲章。四品以下。凡是開國子男。及五等散品名號侯。皆爲銀章。不爲印。

器服略第一

器服略第二

臣謹按考工記曰。一器而工聚焉者。車爲多。上蓋如規象天。二十八撩。音老象列宿。方輿象地。三十幅象日月。前則聽鸞和之響。傍則睹四時之運。等威有辨。貴賤有序者。車之制也。故書曰。明試以功。車服以庸。洎乎魏晉。政教陵遲。僭踰莫禁。世有變改。異制殊狀。今畧舉沿革云。

天子車輅

五輅

古史考云。黃帝作車。至少昊始駕牛。及陶唐氏制彤

車乘白馬則馬駕之初也。有虞氏因彤車而制鸞車。

夏后氏因鸞車而制鈎車。

鈎之言不揉自曲也。

奚仲爲車正。建

旂旒尊卑上下各有等級。商因鈎車而制大輅。

禮緯曰山

車乘鈎乃鈎車之象。昔成湯用而郊祀有山車之瑞。山車謂之桑金車似金根之色亦謂之大輅。周

因商輅以制木輅。約木以加飾爲五輅。一曰玉輅以

祀。二曰金輅以賓。同姓以封。三曰象輅以朝。異姓以

封。四曰革輅以卽戎。以封四衛。五曰木輅以田。以封

藩國。其制度之詳在禮經。秦平天下。閱三代之禮。或

曰商瑞山車金根之色。乃因金根車用金飾而爲帝

軫。黑旗阜旂。以從水德。復法水數。駕馬以六。漢武帝

天漢四年始定輿服之制郊祀所乘謂之大駕車千乘騎萬疋其儀甚盛不必師古及赤眉之亂文物無遺後漢光武平公孫述始獲葆車輿輦因舊制金根車擬周之玉輅最尊者也輪皆朱班重牙貳轂兩轄轂外復有一轂抱轄共外乃復設轄抱銅置其中金簿繆龍爲輿倚較徐廣曰總交錯之形也較在箱上說文曰櫪文畫蕃箱也通俗文曰車箱爲較文虎伏軾龍首銜軛左右吉陽笳鸞雀立衡檣文畫轅羽蓋華蚤建大旂十有二旂畫日月升龍駕六馬象鑣鏤錫金鏤方鈇插翟尾朱兼樊纓赤罽易茸金就十二左纛以鞶牛尾爲之左右駢馬軛上大如斗是爲德車大駕則

御鳳凰車以金根車爲副

其駕黑馬六因秦不改或云始自漢制許慎五經異

義說天子駕六馬以經言時乘六龍以御天故所御皆六餘皆駕四後從爲副車

魏武王受

漢獻帝命乘金根車駕六馬設五時副車至明帝景

初中山在縣黃龍見以爲魏得地統服色尚黃戎事

乘黑首白馬齊王正始中詔出入必御輦乘輿晉武

帝承魏陳留王命乘金根車駕六馬備五時副車及

受禪設玉金象革木五輅並爲法駕旂旂服用悉取

周制文物華藻因金根車更增其飾朱班漆輪加畫

幘文兩箱之後加玳瑁爲鷗翅加以金銀雕飾時人

亦謂爲金鷗車斜注旂旗於車之左又加祭戟於車

之右皆橐而施之。棨戟韜以黼繡。上繫大蛙蟆。幡長丈餘。於戟之杪。轅皆曲向上。取夏商山車垂鈞之義。玉輅駕六馬。以黑金象革木駕四馬。以黃金爲义髦。挿以翟尾。象鑣而鏤錫。金鏤而方鈇。許乞反。鞶纓赤罽。易茸。金就十有二。五輅皆有錫鸞之飾。和鈴之響。鈞膺玉璫。龍輈華轡。朱幘。音紛。法駕行則五輅各有所主。復制金根車。去漢之文物。駕四馬。不建旗幟。上如畫輪車。下猶金根之飾。東晉元帝始建戎輅。大輅各一。以商人祀用大輅。周人卽戎用戎輅。故也。因金根車飾。皆駕黑駟。是爲玄牡。安帝義熙中。平關洛。得姚興僞車輦。或時乘用焉。

宋孝武大明中尚書左丞荀萬秋改造五輅依晉金
根車加赤漆幘畫玉飾諸末建青旗十有二旂駕駟
以黑復因漢之安車章施羽葆蓋以祀金根爲金輅
建青旂駕黑馬四羽葆蓋以賓象革木輅並擬玉輅
漆幘畫羽葆蓋象輅視朝革輅卽戎二輅並建赤旂
駕黑馬四木輅建赤麾以田駕赤馬四大事法駕五
輅俱出齊武帝永平初伏曼容議齊德尚青旗先青
次赤次白次黑軍容戎事宜依漢道行運之色因宋金根車
而脩玉輅五輅江左相承駕駟左右駢爲六初加玉
輅爲重蓋棲寶鳳皇綴金鑷珠璫玉璘珮四角金龍

銜五采旄。又麒麟頭加以采畫。馬首戴之。竟陵王子良啓曰。蓋圓象天。軫方象地。上無二天之儀。下設兩蓋之飾。求諸志錄。難爲折衷。又假爲麟首。加乎馬頭。事不師古。鮮或可施。至建武中。明帝乃省重蓋等。金輅之飾。如玉輅而減少。象輅減。金輅革。輅如象輅而尤減。木輅如革輅。建大赤麾。首施大騶幡。金輅玉輅。建碧旂。象輅木輅。建赤旂。梁武帝初。因齊制。天監三年。五輅旗麾同用赤。而旂不異。以從行運也。七年。帝據周禮。玉輅以祀。金輅以賓。今祀乘金輅。詔下詳議。周捨謂金輅爲齊車。本不關於祭祀。於是改陵廟皆

乘玉輅。轡以朱絲。陳天嘉初。令劉仲舉議造玉金象
革木等五輅。及五色副車。皆金薄交龍。爲輿倚較。文
貌伏軾。虬首銜軛。左右吉陽甯。鸞雀立衡。楹文畫轡。
綠油蓋。黃紋裏。相思撩。金華末邪。注旂旗於車之左。
各依方色。加棨戟於車之右。鞞以黼黻獸頭。幡長丈
四尺。揭於戟杪。玉輅正副同。駕六馬。餘皆駕駟。並金
叉髦。插以翟尾。玉爲鏤錫。又以彩畫蛙蟆。綴兩軸頭。
卽漢之飛軫遺象也。五輅兩箱。後皆用玳瑁爲鷗翅。
加以金銀雕飾。兩箱之裏。衣以紅錦金花帖釘。上用
紅紫錦爲後檐。青紋純帶。夏用花簾。冬用綺繡褥。此

後漸脩具。依梁制。後魏天興初。始制軒冕。未知古式。多違舊章。至孝文。太和中。儀曹令李韶更議。改正。唯備五輅。各依方色。其餘車輦。猶未能具。明帝熙平中。侍中崔光等議。大造車服五輅。並駕五馬。亦無經據。北齊車服制度。多因後魏。天保中所乘。是太和中李韶所制五輅。後周依周禮。設六官。置司輅之職。掌皇帝之輅。十有二等。一曰蒼輅。以祀昊天上帝。二曰青輅。以祀東方上帝。三曰朱輅。以祀南方上帝。及朝日。四曰黃輅。以祭地祇。中央上帝。五曰白輅。以祀西方上帝。及夕月。六曰玄輅。以祀北方上帝。及感帝祭神。

州此六輅通漆之而無他飾卽周木輅之遺象也馬皆䟽面旂就以方色俱十有二七曰玉輅以享先皇加玄服納后八曰碧輅以祭社稷享諸先帝大卜食三老五更享諸侯及耕籍九曰金輅以祀星辰祭四望視朔射饗十曰象輅以望秩羣祀視朝燕射巡省臨學幸道法門十一曰革輅以巡兵卽戎十二曰木輅以田獵行鄉畿此六輅又以六色漆畫之用玉碧金象革物以飾諸末皆錫面金鈎就以五采俱十有二其輅之式飾重較加葺焉隋開皇元年內史李德林奏後魏輿輦乖制請皆廢之唯留太和時李韶所

制五輅。北齊所遵者。後著令。玉輅青質。以玉飾諸末。重箱盤輿。左龍右虎。金鳳翅。畫檠文鳥獸。黃屋左纛。金鳳一。在軾前。八鑾在衡。二鈴在式。龍輈之上。前設障塵。青蓋黃裏。繡旂帶金博山。綴以鑑子。下垂八珮。植四十葆羽。輪皆朱班。重牙複轄。左建太常。十有二旂。皆畫升龍日月。其長曳地。右載闐戟。長四尺。廣三尺。黻文。旗首金龍。頭銜鈴及綬。垂以結綬。駕蒼龍。金鏤方鈇。插翟尾。五隼鏤錫。鞶纓十有二就。皆五采繒。屬爲飾。天子祭祀納后則乘之。金輅赤質。以金飾諸末。左建旗。畫飛隼。右建闐戟。盤輿鳳翅等並同。玉輅

駕赤駟臨朝會同饗射飲至則乘之象輅黃質以象
飾諸末左建旌畫桴麟右建闕戟駕黃駟祀后土則
乘之革輅白質輓之以革左建旗畫騶虞右建闕戟
駕白輅巡狩臨兵則乘之木輅黑質漆之左建旒畫
玄武右闕戟駕黑駟田獵則乘之其五輅並駕六馬
飾同玉輅復制安車重輿曲壁紫油纒裳通幃朱絛
絡網朱鞶纓駕赤駟臨幸所乘按隋氏五輅遠酌周禮
旗旒藻飾近約漢制文質相半唐因隋制玉金象革木是爲天子五輅玉輅
青質重輿左青龍右白虎金鳳翅畫楨文鳥獸黃屋
左纛金鳳一在軾前十二鑾在衡五輅鸞數皆準此制副輅及耕根車

則二鈴在軾龍輈前設障塵青蓋黃裏繡飾博山鑑子植羽輪皆朱班重牙左建旂十有二旂旂畫升龍其長曳地右載闡戟長四尺廣三尺散文旂首金龍頭銜結綬及鈴綬駕蒼龍金鏤方鉉插翟尾五隼鏤錫鞶纓十有二就祭祀納后則供之金輅赤質餘同玉輅駕赤騮饗射祀還飲至則供之象輅黃質餘同金輅駕黃騮行道則供之革輅白質輓以革餘同象輅駕白駱巡狩臨兵事則供之木輅黑質漆之餘同革輅駕黑騮田獵則供之旌旗鞶纓及蓋皆從輅色其蓋文裏俱用黃其鏤錫五輅並同其飾武德初著

令天子鑾輅。玉金象革木五等。屬車十乘。指南車。記里鼓車。白鷺車。鑾旗車。辟惡車。皮軒車。耕根車。安車。四望車。羊車。貞觀元年十一月始加黃鉞車。豹尾車。通爲十二乘。以爲儀仗之用。大駕行幸。則分前後施於鹵簿之內。若大陳設。則行分左右。施於儀仗之中。高祖太宗大禮則乘輅。高宗不喜乘輅。每有大禮則御輦至。武太后以爲常。明皇以輦不中禮。廢而不用。開元十一年冬。祀南郊。乘輅而往。禮畢騎還。自是行皆騎於儀仗之內。其五輅腰輿陳於鹵簿而已。

副車

秦平天下。以諸侯所乘之車爲副車。漢制安車立車各五乘。爲乘輿副車。輪皆朱班重牙。貳轂兩轄。金薄繆龍爲輿倚較。文虎伏軾。龍首銜軛。左右吉陽。簞鸞雀立衡。楯文畫軸。羽蓋華蚤。建大旂十有二旂。畫日月升龍。駕六馬。象鑣鏤錫。金鏤方銳。插翟尾。朱兼樊纓。赤罽易茸。金就十有二。左燾以釐牛尾爲之。在左。駢馬軛上。大如斗。其馬各如方色。白馬者。朱其髦尾。爲朱鬣云。所御駕六。餘皆駕四。後從爲副車。應劭漢官鹵簿

圖曰。乘輿大駕則御鳳皇。以金根爲副。

魏因漢制。五時副車。置髦頭雲

罕。晉制五安車。五立車。合十乘。名五時車。俗謂五帝

車建旗十二旂各如車色立車則正植其旗安車則斜注駕馬仍漢制左右駢驂金鏤鏤錫黃屋左纛如金根之制行則從後東晉過江副車遺缺有事權以馬車代之建旗其上其後制五色木車象五時車植旗於牛背行則使人輿之牛之爲義蓋取負重致遠而安穩旗常纏而不舒所謂德車結旌唯天子親戎五旗舒旆所謂武車緩旌宋因晉而無副車齊王儉議乘黃無副今衣書車十二乘古副車之象也亦曰五時副車青萌車是謂掄他合反幟車梁依晉置五牛旗車左青赤右白黑黃居其中象古之五時副車一曰副車陳因舊制五時副車飾

同五輅。並駕六馬。隋因陳制。五時副車。色及旗章。一同正輅。唯降二等。駕用四馬。唐之制。副輅五乘。大駕行幸。皆次於五輅。

戎車

周中車。氏革輅。卽戎車。車僕掌戎輅之萃。音律。廣車之萃。闕車之萃。萃車之萃。輕音聲車之萃。

萃。猶副也。此五者。兵車所謂五戎也。漢戎車不巾。不蓋。其飾如耕車。蕃以牙。麾金鼓。羽析幢。翳。輔。胄。甲。弩。之。簾。魏景初。改正朔。戎事乘黑首白馬。建大赤之旗。太始中。並建赤旗。晉制。輕車。駕二馬。古之獸車也。前後二十乘。分居左右。輿輪洞朱。建牙戟。麾幢。置弩於軾上。大駕出射。聲校尉司馬。吏士載以次。屬車後。宋依漢制。戎車。建牙。麾。邪。注之。載金鼓。羽幢。置甲。弩於軾上。輕車之制。因漢不易。以武剛車爲殿。孫子兵法曰。有中。有蓋。謂之武剛車。齊梁已下。及後周。與隋。或并用之。

獵車

周謂之奇車。曲禮曰。國君不乘奇車。注云。獵車也。巾車。氏木輅。以田。漢制。其飾如安車。重輜。纒。

輪緜龍繞之。一曰闕猪車。親校獵乘之。魏因漢制。改
 名關虎車。晉因魏制。一名闕戟車。宋因晉制。自後無
 聞。

指南車 黃帝與蚩尤戰於涿鹿之野。蚩尤作大霧。將
 士皆迷。四方黃帝於是作指南車。以指示方向。

故後常建焉。出崔豹古今注。周致太平。越裳氏重譯
 來獻。使者迷其歸路。周公為司南之制。使載之南。周

年。至國。故常為先導。示服遠人。而正四方。漢初。置俞
 兒。騎馬為先驅之乘。左思曰。俞兒。騁路指南。司方。後

廢其騎。而存其車。後漢張衡始復創造。漢末喪亂。其
 器不存。魏明帝青龍中。令博士馬鈞。紹作焉。車上有

木仙人。舉手常指南。車箱回轉。所指微差。晉亂。復亡。
 東晉義熙十三年。劉裕平長安。始得此車。復修之。一

名司南車。駕駟其下。制如樓。三級。四角。金龍銜羽。葆
 刻木為仙人。衣羽衣。立車上。車雖迴運。而手常指南。

大駕出行。為先啓之乘。此車戎狄所制。有巧思。常謂
 曲頻。驟猶須人力。正之。范陽人祖冲之。有巧思。常謂

宜更造。宋順帝昇明中。齊高帝為相。冲之造焉。車
 成。使撫軍將軍丹陽尹王僧虔等試之。其制甚精。百

成。使撫軍將軍丹陽尹王僧虔等試之。其制甚精。百

成。使撫軍將軍丹陽尹王僧虔等試之。其制甚精。百

成。使撫軍將軍丹陽尹王僧虔等試之。其制甚精。百

屈千迴未嘗移變齊因宋制而加飾焉梁復名司南
車大駕出為先啓之乘後魏武帝使工人郭善明
造之彌年不就扶風人馬岳又造垂成善
明醜殺之唐修之備於大駕行則先導

記里鼓車東晉安帝義熙十三年劉裕滅後秦所獲
人執槌向鼓行一里則打一槌崔豹古今注云亦各

大章車所以識道里也車上有二層皆有木人執槌

行一里下一層擊鼓行十里上一層擊鑼尚方故事

存其作法然未詳宋因之不易大駕鹵簿次指南車

後齊因宋制而加飾焉梁因齊制改駕

以牛唐復修大駕鹵簿次指南車後

白鷺車隋一名鼓吹車車上施層樓樓上有翔鷺棲
馬唐因之駕四馬大駕出在記里鼓車後

鷺旗車漢制鷺旗車析羽毛而編之列繫幢傍胡廣
先輅所載也唐備於大

駕鹵簿次白鷺車後
辟惡車秦制也挑弓鞞矢所以禳拔不祥太卜令一
人在車執弓箭出崔豹古今注唐之制駕四

馬大駕出在

皮軒車漢制皮軒車以虎皮為軒晉宋相因駕四馬皆大夫載自後無聞唐備之以大駕鹵薄次

於辟惡

耕根車漢制耕根車如副車有三蓋一曰芝車置

因之駕駟天子親耕所乘置耜於軾上一名三蓋

六馬其軾平以青囊盛耒耜而加之藉田

安車周制致仕之老及后乘之漢制乘輿金根車

坐乘曰安車是為德車五時車安立亦皆如之各如

方色馬亦如之建大旂十有二旂駕六馬餘皆駕四

因之天子所御則駕六餘皆駕四三公下至九卿各

一乘公駕三特進駕三卿駕一宋因之齊制諸王三

公國公列侯等行禮則乘之隋制金飾紫通轆朱裏

駕四馬臨幸及賜予則供之唐之制以金飾

駕四馬臨幸則乘之大駕出在耕根車後

四望車齊四望車通憶油幢絡班漆輪轂亦曰阜輪

朱裏紫通憶紫絲網駕一牛拜陵臨弔則乘之唐之制以金飾駕四馬拜陵臨弔則乘之大駕出在安車

後

遊車漢制九遊車九乘大駕為先乘宋因之自後無聞

羊車晉制羊車一名輦車其上如輶伏兔箱漆畫輪軛武帝時護軍羊琇乘羊車為司隸校尉劉毅

糾劾梁因制羊車小兒衣青布袴褶五辯髻數人引之貴賤通得乘之名牽子也隋大業始置焉制如輶

車金寶飾紫錦憶朱絲網馭童二十人皆兩環髻服青衣年十四五者乘之謂之羊車小史駕以果下馬

其大如羊唐因之小史十四人

畫輪車晉制畫輪車駕牛以彩漆畫輪轂上起四夾杖左右開四望綠油幢朱絲青交絡其上形

制如輦其下猶犢車貴者不乘牛車漢武帝推恩之

未諸侯寡弱貧者至乘牛車其後稍貴天子至士遂

為常乘至尊出朝堂舉哀乘之大駕次羊

車後宋齊梁相因為羣公所乘自後無聞

鼓吹車梁制鼓吹車上施曾樓四角金龍銜旒蘇羽

荀簾為樓上有翔鷺棲焉或為鶴形自後無聞

象車晉武帝太康中平吳後南越獻馴象詔作大車

大駕鹵簿行則試橋道自後不見

黃鉞車晉制黃鉞車駕一馬大駕行次於華蓋後御

觀以後加之備於大駕鹵簿天寶元年改為金鉞車

豹尾車周制也古者軍正建之漢制大駕出屬車八

正挑豹皮以正其眾禮記曰前士師則載虎皮乘輿

豹尾以其義類唐之制大駕出在黃鉞車後駕二馬武衛隊正一人在車執之

建華車

晉制建華車二乘駕四馬大駕出分在左右行自後無間

皇太后皇后車輅

周禮王后之五輅一曰重翟二曰厭翟三曰安車四曰翟車五曰輦車漢皇后駕輅青羽蓋駕四馬旆九旒後漢太皇太后皇太后皇后法駕皆御金根車重翟羽蓋加青交絡帷裳非其法駕則乘紫罽輅車雲櫺文畫輅黃金塗五末五末輅一轂二箱二共五也蓋蚤施金花駕三馬左右駢晉制后乘重翟羽蓋金根車加青絡青帷裳雲櫺畫輅黃金塗五末蓋蚤施金華駕三馬

左右駢其廟見小駕則乘紫罽駟車飾及駕馬如重
翟非法駕則皇太后乘輿皇后畫車后先蠶乘油畫
雲母安車駕六駟馬駟音茂黑
色音貴油畫兩轅安車駕五駟
馬爲副又金博山駢紫絳罽車皆駕三駟馬宋因之
法駕乘重翟齊因重翟車車加金塗飾後魏熙平中
有司蘇紹議皇后之輅其從祭則御金根車親喪則
御雲母車歸寧則御紫罽車遊行御安車弔問御緝
罽車並駕四馬北齊因之後周皇后之車十二等一
曰重翟以從皇帝祀郊禘享先皇朝皇太后二曰厭
翟以祭陰社三曰翟輅以採桑四曰翠輅以從皇帝

見賓客。五曰雕輅。以歸寧。六曰篆輅。以臨諸道法門。六輅皆錫面朱總金鈎。七曰蒼輅。以適命婦。八曰青輅。九曰朱輅。十曰黃輅。十一曰白輅。十二曰玄輅。五時常出則供之。六輅皆疏面績總。隋開皇初。李德林奏用後魏熙平。蘇紹議。皇后之輅。後著令制重翟青質。金飾諸末。朱輪。金根。朱牙。其箱飾以重翟羽。青油幢。朱裏。通憶。繡紫帷。朱絲絡網。繡紫絡帶。八鑿在衡。鏤錫。鞞。纓。十二。就。金鏤方鈇。插翟尾。朱總。駕蒼龍。受冊。從祀郊禱。享廟則供之。厭翟。赤質。金飾諸末。輪。畫朱牙。其箱飾以翟羽。紫油幢。朱裏。通憶。紅錦帷。朱絲

絡網紅錦絡帶。餘如重翟駕赤騮。親桑則供之。翟車黃質。金飾諸末。輪畫朱牙。其車側飾以翟羽。黃油幢黃裏。通憶。白紅錦帷。朱絲絡網。白紅錦絡帶。餘如重翟。駕黃騮。歸寧則供之。諸鞶纓之色。皆從車質。安車赤質。金飾。紫通憶。朱裏。駕四馬。臨幸及弔則供之。輦金飾。同於蓬輦。通憶。班輪。駕四馬。官苑近行則乘之。屬車三十六乘。唐因隋制。重翟。厭翟。翟車。安車。其飾不易。又制四望車。紫油。朱質。通憶。畫絡帶。拜陵臨弔則供之。又制金根車。朱質。紫油。通憶。畫絡帶。朱絲絡網。常行則供之。

皇太子皇子車輅

周制中車氏掌王五輅。金輅建大旂。以封同姓。

同姓謂王

子母弟率以功德出封。若魯衛之屬。

漢皇太子皆安車。朱班輪。飛軫。青

蓋。金花瓜。倚虎較。伏鹿軾。櫪文畫轡。吉陽筭。文輅。金

塗五末。旂九旂。畫降龍。皇太子爲王。賜以乘之。皇孫

綠車以從。皆左右駢三馬。

名皇孫車

魏因之。文帝問東平

王有輅。爲是特賜乎。鄭稱對曰。天子五輅。金輅以封

同姓。諸侯得與天子同乘金輅。非特賜。晉因魏安車

而駕三馬。非法。駕則乘畫輪車。上開四望。綠油幢。朱

絲繩絡。兩箱裏飾。以金錦黃金漆塗五末。其副車三

乘形制如所乘。但不畫輪耳。王青蓋車。皇孫綠蓋車。並駕三。左右駢。東晉安帝時。乘後山安車。制如金輅。宋因之。皇子爲王。亦錫以皇太子之安車。皇孫綠車。亦因舊法。齊皇太子乘象輅。校飾如御。旂旗九旂。降龍。梁因齊象輅制。鑿輅。駕三。左右駢。朱班輪。倚獸較。伏鹿軾。九旂降龍。青蓋。畫幡。文軸。金塗五末。以畫輪。車爲副。常乘畫輪。則衣書車爲副。其畫輪車上開四。望綠油幢。朱繩絡。兩箱裏飾以金錦。陳因梁制。後魏乘金輅。朱蓋。赤質。駕四馬。北齊因之。隋皇太子金輅。赤質。金飾諸末。重較。箱畫。模文鳥獸。黃伏鹿軾。龍軸。

金鳳一在軾前。設障塵。朱蓋黃裏。輪畫朱牙。左建旂九斿。右載闕戟。旂首金龍頭。銜結綴及鈴綫。駕赤駟。八鑾在衡。二鈴在軾。金鏤方鈇。插翟尾五隼。鏤錫鑿纓九就。從祀享廟。正冬大朝。納妃則乘之。軺車金飾諸末。紫通幟。朱裏。駕一馬。五日常朝。饗官官出入行道乘之。四望車。金飾諸末。紫油幢。通幟。朱裏。朱絲絡網。駕一馬。弔臨則乘之。唐因隋制。

公侯大夫等車輅

周制。巾車。掌王五輅。象輅以封異姓。革輅以封四衛。木輅以封藩國。又曰服車五乘。孤乘夏篆。卿乘夏縵。

大夫乘墨車。士乘棧車。庶人乘役車。漢景帝中元五年始詔六百石以上施車。幡得銅五末。輓有陽。簡中二千石以上右駢。三百石以上阜布蓋。千石以上阜繒蓋。二百石以下白布蓋。皆有四維。杠衣。賈人不得乘馬車。除吏赤蓋。杠其餘皆青。大使車立乘。駕駟。赤帷裳。持節者重導。從賊曹車。斧車。督車。功曹車。皆兩大車。伍伯。瓌。弩十二人。辟車四人。從車四乘。小使車不立乘。有駢。赤屏。泥油。重絳帷。導無斧車。近小使車。蘭輿。赤轂。白蓋。赤帷裳。從騎四十人。此謂追捕。考按有所勅取者之所乘也。諸使車皆朱班輪。四幅。赤衡。

輓公卿二千石郊廟明堂祠陵法出皆大車立乘駕
駟他出乘安車公卿以下至縣三百戶長導從置門
下五吏賊曹督察盜賊功曹皆帶劔三車導主簿主
記兩車爲從縣令以上加導斧車後漢制公侯乘安
車駕二右駢皆朱班輪飛軫倚鹿較伏熊軾阜繒蓋
黑幡中二千石二千石皆阜蓋朱兩幡千石六百石
朱左幡晉制雲母車以雲母飾犢車臣下不得乘以
賜王公耳阜輪車駕四牛形如犢車阜漆輪轂上加
青油幢朱絲繩絡諸王三公有勲德者特加之位至
公或四望三望夾望車油幢車形制如阜輪但不漆

轂耳通憶車。駕牛如犢車。但舉其憶通覆車上也。諸王三公並乘之。諸公給朝車。駕駟安車。黑耳。駕三各一乘。阜輪犢車各一乘。自祭酒掾屬以下及令史皆阜輪。特進及車騎驃騎以上。諸大將軍不開府。非持節都督者。給安車。黑耳。駕二三公。九卿。中二千石。二千石。河南尹。謁者。僕射。郊廟法出。皆大車。立乘。駕四。他出乘安車。其去位致仕告老。賜安車。駟馬。郡縣公侯安車。駕二右駢。皆朱班輪。倚鹿較。伏熊軾。黑輜。阜繒蓋。公旗旂八旂。侯七旂。卿五旂。皆畫降龍。中二千石二千石。皆阜蓋。朱兩輦。駕二。中二千石以上右駢。

千石六百石朱左轎。王公之元子攝命理國者安車。駕三旗旂七旂。其封侯之元子五旂。大使車立乘。駕四赤帷裳。駟騎導從。舊公卿二千石郊廟上陵從。駕所乘小使車。不立乘。駕四輕車之流也。蘭輿皆朱轂赤屏泥。白蓋赤帷裳。又別有小使車。赤轂阜蓋。追捕執取者所乘。凡諸使車皆朱班輪。赤衡軛。追鋒車。去小平蓋。加通幔。如輅車。駕二追鋒者。以迅速爲名。施於戎陣之間。是爲傳乘。輅車。古之將軍車也。一馬曰輅車。二馬曰輅傳。按漢世貴輅輅而賤輅車。魏晉重輅車而賤輅輅。三品將軍以上尚書令。輅車。黑耳。有

後戶僕射但有後戶無耳並阜輪也宋因晉有追鋒車雲母車四望車公及列侯所乘安車依漢舊制駕二馬旂旗旂王公侯七卿五皆降龍公卿中二千石郊陵法出皆大車立乘駕四他出去位致仕皆安車駟馬中二千石皆阜蓋朱輜銅飾五末駕二右駢王公世子攝命理國者安車駕三旂旗七旂侯世子五旂齊制黃屋車建碧旂九旂九命上公所乘青蓋安車朱輜班輪駕一左右駢通憶車爲副諸王禮行所乘阜蓋安車朱輜漆班輪駕一馬通憶朱車爲副三公禮行所乘安車黑耳阜蓋朱輜駕一牛車爲副國

公列侯禮行所乘馬車。駕一。九卿領護。二衛驍游。四軍五校從郊陵所乘。餘同晉法。梁制二千石四品以上及列侯。皆給輅車。駕牛。伏兔箱。青油幢。朱絲絡網。轂皆黑漆。天監二年。令三公開府尚書令。則給鹿輅。輅施耳。後戶。阜輅。尚書僕射。左右光祿大夫。侍中。中書監令。祕書監。則給鳳輅。後戶。阜輅。領護。國子祭酒。太子詹事。尚書侍中。列卿等。則給聊泥輅。無後戶。漆輪。車騎驃騎及諸王除刺史帶將軍。則給龍雀輅。以金銀飾。御史中丞。給方蓋輅。形小如傘。諸王三公有勲德者。皆特加阜輪車。駕牛。形如犢車。但烏漆輪。

轂黃金雕裝上加青油幢。朱絲絡通幃。王公加禮者給油幢絡車。駕牛。朱輪華轂。後魏三公及王車。朱屋青蓋。制同五輅。名曰高車。駕三馬。庶姓王侯及尚書令僕以下。列卿以上。並給輅車。駕一馬。或乘四望通幃車。駕一牛。北齊因之。庶姓王至儀同三司以下。翟尾扇紫傘。皇宗及三品以上官。青傘。朱裏。其青傘碧裏。達於士人。不禁。正從一品執事散官及儀同三司。乘油色朱絡網車。車牛飾得用金塗及純銀。二品三品得乘卷通幃車。車牛飾用金塗。四品以下。七品以上。得乘偏幃車。車牛飾以銅。後周諸公之輅。九方輅。

各象方
之色。

碧輅。金輅。皆錫面。鞶纓九就。金鈎象輅。犀輅。貝輅。革輅。篆輅。木輅。皆疏面。鞶纓九就。凡就皆以朱。白。蒼。三采。諸侯自方輅而下八。無碧輅。諸伯自方輅而下七。又無金輅。諸子自方輅而下六。又無象輅。諸男自方輅而下五。又無犀輅。凡就各如其命。三公之輅。車九。祀輅。犀輅。貝輅。篆輅。木輅。夏輅。纓車。墨車。棧車。自篆輅以上。金塗。諸末。疏錫。鞶纓。金鈎。木輅以下。銅飾。諸末。疏面。鞶纓。皆九就。三孤自祀輅而下八。無犀輅。六卿自祀輅而下七。又無貝輅。上大夫自祀輅而下六。又無篆輅。中大夫自祀輅而下五。又無木輅。

下大夫自祀輅而下四。又無夏輅。士車三。祀車。墨車。棧車。凡就各如其命數。自孤以下。就以朱綠二采。隋制。公及一品象輅。黃質。以象飾諸末。建旗。畫以鳥隼。受冊告廟。升壇。上任親迎及葬。則乘之。侯伯及二品三品革輅。白質。建旗。畫熊虎。受冊告廟。親迎及葬。則乘之。子男及四品木輅。黑質。以漆飾之。建旒。畫龜蛇。受冊告廟。親迎及葬。則乘之。象輅以下。旂及就數。各依爵品。犢車。則魏武賜楊彪。七香車也。駕牛。自王公已下。至五品以上。並給乘之。三品以上。青幘。朱裏。五品以上。紺幘。碧裏。皆白銅裝。唯有參謁及弔喪者。則

不張幟而乘鐵裝車。六品以下不給。任自乘犢車。弗許施幟。初五品以上乘偏幟車。其後嫌其美。停不用。以白幟代之。三品以上通幟車。則青壁。一品軺車。油幟。朱網。唯車輅一等。聽勅始得乘之。唐王公以下車輅。親王及武職一品象輅。自餘及二品三品革輅。四品木輅。五品軺車。象輅朱班輪。左建旂。通帛旂畫龍。一升一降。右載闔戟。革輅以革飾。左建旒。通帛旒餘同象輅。木輅以漆飾之。餘同革輅。軺車曲壁青通幟。諸輅質蓋旂。旒皆朱。一品九旂。二品八旂。三品七旂。四品六旂。其鞶纓就數皆准此。

主妃命婦等車

漢制長公主乘赤罽駢車。大貴人、公主、王妃封君油畫駢車。大貴人加節畫輶。皆右駢而已。公列侯中二千石二千石夫人會朝若親蠶各乘其夫之安車。右駢加交絡帷裳。皆阜。非公會不得乘朝車。得乘漆布輜輶車。銅飾五末。晉制三夫人油駢車。駕兩馬。左駢其貴人加節畫輶。三夫人助蠶乘青交絡安車。駕三。皆以紫絳罽輶車。九嬪世婦乘輶車。駕三。長公主赤罽輶車。駕兩馬。公主。王太妃。王妃皆油輶車。駕兩馬。右駢。公主油畫安車。駕三。青交絡以紫絳罽輶車。駕

三馬爲副。王太妃三夫人亦如之。公主助蠶，乘油畫安車。駕三。公主有先置者，乘青交絡安車。駕三。諸王妃。公大夫。夫人。縣鄉郡公侯特進夫人助蠶，乘阜交絡安車。駕三。諸侯監國世子之世婦，侍中常侍尚書中書監令卿校世婦，命婦助蠶，乘阜交絡安車。儷駕郡縣公侯中二千石二千石夫人會朝及蠶，各乘其夫之安車，皆右騂。阜交絡，阜帷裳。自非公會，則不得乘輶車。王妃特進夫人封郡君。安車，駕三。阜交絡。封縣鄉君。油駟車。駕兩馬。右騂。宋齊依晉，無大更革。梁天監二年，令上臺六宮長公主，公主，諸王太妃，王

妃皆得乘青油輿。搗幢通憶車。以搗幢涅憶爲副。采
女。皇女。諸王嗣子。侯夫人。皆乘赤油搗幢車。以涅憶
爲副。侍女直乘涅憶二乘。後周制。公夫人之輅車九
厭翟。翟輅翠輅。皆錫面朱總金鈎。雕輅篆輅。皆勒面
刻白黑韋。績總朱輅黃輅白輅玄輅。皆雕面。刻漆韋
爲當顯。鷺總總黑色繒其。諸侯夫人自翟輅而下八。諸伯夫
人自翠輅而下七。諸子夫人自雕輅而下六。諸男夫
人自篆輅而下五。鞶纓就數。各視其君。三妃三公夫
人之輅九。篆輅朱輅黃輅白輅玄輅。皆勒面績總。夏
篆夏纁墨車。棧車。皆雕面鷺總。三妃。由力三孤內子。

自朱輅而下八。六嬪。六卿內子。自黃輅而下七。上媛婦。中大夫孺人。自玄輅而下五。下媛婦。下大夫孺人。自夏篆而下四。御婉士婦人。自夏縵而下三。其輦纓就。各以其等。皆簞第漆之。君以赤。卿大夫士以黑。君駕四馬。三駟六轡。卿大夫士駕二馬。一駟四轡。隋制。皇太子妃乘翟車。以赤爲質。駕三馬。畫轅金飾。犢車爲副。紫幟。朱網絡。良娣以下。並乘犢車。青幟。朱裏。三公夫人。公主。王妃。並犢車。紫幟。朱網絡。五品以上命婦。並乘青幟。與其夫同。唐制。內命婦。夫人乘厭翟車。嬪乘犢車。婕妤以下。乘安車。各駕二馬。外命婦。公主。

王妃乘厭翟車。駕二馬。自餘一品乘白銅飾犢車。青通幟。朱裏油幟。朱絲網。駕牛。二品以下。去油幟。絡網。四品。青偏縵。其王公以下。車輅皆太僕官造。貯掌之。若受制行冊命。及三時巡陵婚葬。則給之。

輦輿

輦。人所輦也。徐爰釋問云。天子御輦。侍中陪乘。今輦制象輅車而不施輪。通幟。朱絡。飾以金玉。用人荷之。或曰。夏后氏末代制輦。名曰余車。商曰胡奴車。周曰輜車。卽輦也。王后輦車。組纒有翳。羽蓋。秦爲人君之乘。漢因之。成帝遊後庭。則乘輦。魏晉小出則乘之。亦

多乘輿。東晉過江，亡其制度。至太元中，謝安率意造焉。及破苻堅於淮上，獲京都舊輦，形制無差。義熙五年，劉裕執慕容超，獲金鉦輦，宋因之。齊亦因之，而盛增其飾。又制臥輦，校飾如坐輦，不堪服用。復制小輿，形如輶車，小行幸則乘之。輿，說文云：籜竹輿也。周禮考工記曰：周人上輿。漢室制度，以雕玉爲之，方徑六尺。今輿制如輦，而但小耳。宮苑宴私則御之，梁制小輿似輶車，金裝漆畫，施八橫。元正大會，乘出上殿，西堂舉哀亦乘之。行則從後，一名羊車，一名輦。其上如輶，小兒衣青布袴褶，五瓣髻，數人引之。漢氏或以人

牽或駕果下馬。梁貴賤通乘名曰牽子。又制步輿方四尺。上施隱膝。優老者人輿升殿。司徒謝朓以脚疾優之。自天子至下賤。得通乘步輿。又制副輦加笨。步本反如犢車。通幟朱絡。謂之蓬輦。後魏道武帝天興初。始修軒冕制。乾象輦。羽葆圓蓋。畫日月五星。二十八宿。天街雲罕。山林竒瑞。遊鱗飛鳳。朱雀玄武。騶虞青龍。駕二十四馬。又制大樓輦車。龍輈加玉飾。四轂六衡。方輿圓蓋。建太常。畫升龍日月。駕二十牛。又制象輦。左右金鳳。白鹿仙人。羽葆旒蘇。金鈴玉佩。初駕二象。後以六駝代之。復有遊觀小樓等輦。駕十五馬車。

等草創脩制多違舊章隋制輦而不施輪通幟朱絡飾以金玉而人荷之又依梁制副輦復制輿如輦而小宮苑私宴御之小輿幟方形同幄帳自閣內升正殿御之唐制輦有七一曰大鳳輦二曰大芳輦三曰仙遊輦四曰小輕輦五曰芳亭輦六曰大玉輦七曰小玉輦輦有三一曰五色輦二曰常平輦三曰腰輦大駕鹵簿先五輅而行

旌旗

黃帝振兵教熊羆貔貅驅虎制陣法設五旗五麾夏氏奚仲爲車正建旗旂旒以別尊卑等級商因之周

制司常掌九旗。王建太常，諸侯建旂，孤卿建旛，大夫
士建物，師都建旗，州里建旛，縣鄙建旒，道車載旒，游
車載旌，大麾以田，大帛以卽戎，翻旌龍旃，秦水德，旗
旂皆尚黑，其制未詳。漢制，龍旂九旂，七仞，以象大火，
鳥旗七旂，五仞，以象鶉火，熊旗六旂，五仞，以象參伐，
龜蛇旒四旂，四仞，以象營室，弧旌枉矢，以象弧也。此
諸侯以下之所建也。後周太常畫三辰，旂畫青龍，旗
畫朱鳥，旒畫黃麟，旗畫白虎，旒畫玄武，皆加雲氣，其
旛物在軍，亦畫其事，號加以雲氣，徽幟亦如之。旌節
又畫白虎，而析羽於其上，又司常掌旗物之藏，通帛

之旗六。以供郊丘之祀。蒼青朱黃白黑六旗。畫績之。以充玉輅之等。一曰三辰之常。二曰青龍之旗。三曰朱鳥之旗。四曰黃麟之旗。五曰白虎之旗。六曰玄武之旗。皆左建旗而右建鬪戟。又有繼旗四。以施軍旅。一曰麾。以供軍將。二曰旛。以供師帥。三曰旂。以供旅帥。四曰旆。以供卒長。諸公方輅。碧輅建旂。金輅建旗。篆輅建物。木輅建旄。諸侯自金輅而下。如諸公之旗。諸伯自象輅而下。如諸侯之旗。諸子自犀輅而下。如諸伯之旗。諸男自篆輅而下。如諸子之旗。三公犀輅。貝輅。篆輅。建旄。木輅。建旄。夏篆。夏纓。及棧車。建物。孤。

卿以下各以其等建其旗旌杠。皇帝六刃。諸侯五大。夫四。士三。旂。皇帝曳地。諸侯及軹。大夫及轂。士及軫。凡注毛於杠首曰綏。析羽曰旌。全羽曰旒。

鹵簿屬車

附

古者諸侯九乘。秦滅九國。兼其車服。故制大駕屬車八十一。薛綜曰。屬者。相連屬也。皆在後。或行。法駕半之。左右分行。其車

皆阜蓋赤裏朱轡。輜戈矛弩箛。尚書御史所載。最後

一乘垂豹尾。以前爲省中。胡廣曰。施之道路。故須豹尾。過後屯圍。乃得解。省中

卽今之仗內。漢制。乘輿大駕。備車千乘。騎萬匹。屬車八十

一乘。公卿奉引。太僕大將軍參乘。祀天於甘泉用之。

後漢明帝上原陵大喪，並因前代爲大駕，用八十一乘。祀天南郊，則法駕用三十六乘。河南尹執金吾、雒陽令奉引，奉車郎、御史侍中參乘，前驅有九旂、雲罕、鳳皇車、闔戟車、皮軒車、鸞旗車。後有金鉦車、黃鉞車、黃門鼓車。黃門令校駕，祀天南郊以法駕。祀地明堂，省什三。祀宗廟，尤省。謂之小駕。每出，太僕奉駕，上鹵簿，中常侍、小黃門副、尚書主者、郎、令、史、副、侍、御史、蘭臺令、史、副皆執法以督整車騎。謂之護駕。春秋上陵，尤省於小駕。直事尚書一人。從晉制，大駕鹵簿先象車、鼓吹一部，十三人。中道、次靜室、令駕一。中道、式道。

候二人。駕一。分左右。次洛陽尉二人。騎。分左右。次洛陽亭長九人。赤車。駕一。分三道。鼓吹正二人。引。次洛陽令。阜車。駕一。中道。次河南中部掾。中道。河橋掾在左。功曹史在右。並駕一。次河南尹。駕駟。戟吏六人。次河南主簿。駕一。中道。次河南主記。駕一。中道。次司隸部河南從事。中道。都部從事居左。別駕從事居右。並駕一。次司隸校尉。駕三。戟吏六人。次司隸主簿。駕一。中道。次司隸主記。駕一。中道。次廷尉明法掾。中道。五官掾居左。功曹史居右。並駕一。次廷尉卿。駕駟。戟吏六人。次廷尉主簿。主記。並駕一。在左。太僕引從如廷

尉在中。宗正引從如廷尉。在右。次太常。駕駟中道。戟吏六人。次太常外部掾。居左。五官掾功曹史居右。並駕。一次光祿引從中道。太常主記居左。衛尉引從居右。並駕。一次太尉外督令史。駕一。中道。次東西捕賊倉戶等曹屬。並駕一。引從。次太尉。駕駟中道。太尉主簿舍人各一人。祭酒二人。並駕一。在左右。次司徒引從。駕駟中道。次司空引從。駕駟中道。三公騎令史戟各八人。鼓吹各一部。七人。次中護軍。中道。駕駟鹵簿左右各二行。戟楯在外。弓矢在內。鼓吹一部。七人。次步兵校尉在左。長水校尉在右。並駕一。各鹵簿左右。

二行。戟楯在外。刀楯在內。鼓吹各一部。七人。次射聲校尉在左。翊軍校尉在右。並駕一。皆鹵簿。左右各二行。戟楯在外。刀楯在內。鼓吹各一部。七人。驍騎將軍在左。游擊將軍在右。並駕一。皆鹵簿。左右引各二行。戟楯在外。刀楯在內。鼓吹各一部。七人。騎隊五在左。五在右。隊各五十四匹。命中督二人。分領左右。各有戟吏二人。麾幢揭鼓。在隊前。次左將軍在左。前將軍在右。並駕一。皆鹵簿。左右各二行。戟楯在外。刀楯在內。鼓吹各一部。七人。次黃門麾騎中道。次黃門前部鼓吹。左右各一部。十三人。駕駟八。校尉佐仗。左右各四。

行外大戟楯次九尺楯次弓矢弩並熊渠攸飛督領
之次司南車駕駟中道護駕御史騎夾左右次謁者
僕射駕駟中道次御史中丞駕一中道次虎賁郎將
騎中道次九游車中道武剛車夾左右並駕駟次雲
罕車駕駟中道次關戟車駕駟中道長戟邪偃向後
次皮軒車駕駟中道次鸞旗車中道建華車分左右
並駕駟次護駕尚書郎三人都官郎中道駕部在左
中兵在右並騎又有護駕尚書一人騎督攝前後無
常次相風中道次司馬督在前中道左右各司馬史
三人引仗左右各六行外大戟楯二行次九尺楯次

刀楯次弓矢次弩次五特車左右有遮則騎次典兵
中郎中道督攝前却無常左殿中御史右殿中監並
騎次高蓋中道左畢右罕次御史中道左右節郎各
四人次華蓋中道次殿中司馬中道殿中都尉在左
殿中校尉在右左右各四行細楯一行在弩內又殿
中司馬一行殿中都尉一行殿中校尉一行次柵鼓
中道次金根車駕六馬中道太僕卿大將軍參乘左
右又各增三行爲九行司馬史九人引大戟楯二行
九尺楯一行刀楯一行由基一行細弩一行細跡禽
一行椎斧一行刀楯一行連細楯殿中司馬都尉殿

中校尉爲左右各十二行。金根車。建青旂旂十二。左將軍騎在左。右將軍騎在右。殿中將軍持鑿腦斧夾車。車後衣書主職步從六行。合左右三十二行。次曲華蓋。中道侍中散騎常侍黃門侍郎並騎。分左右。次黃鉞車。駕一。在左。御麾騎在右。次相風。中道。次中書監騎。左秘書監騎。右。次殿中御史騎。左。殿中監騎。右。次五牛旗。赤青在左。黃在中。白黑在右。次大輦。中道。太官令丞在左。太醫令丞在右。次金根車。駕駟。不建旗。次青立車。次赤立車。次赤安車。次黃立車。次黃安車。次白立車。次白安車。次黑立車。次黑安車。合十乘。

並駕駟建旗十二旂。如車色。立車正豎旗。安車邪拖之。次闢猪車。駕駟。中道無旗。次耕根車。駕駟。中道赤旗十二旂。熊渠督左。欽飛督右。次御輅車。次御四望車。次御衣車。次御書車。次御藥車。並駕牛。中道次尚書令在左。尚書僕射在右。又尚書郎六人。分左右。並駕。又治書侍御史二人。分左右。又侍御史二人。分左右。又蘭臺令史。分左右。並騎。次豹尾車。駕一自豹尾車後。而鹵簿盡矣。但以神弩二十張夾道。至後部鼓吹。其五張神弩。置一將。左右各二將。次輕車二十乘。左右分駕。次旒蘇馬六十四。次金鉞車。駕三。中道左。

右護駕尚書郎并令史並騎各一人。次金鉦車駕三。中道左右護駕侍御史并令史並騎各一人。次黃門後部鼓吹左右各十三人。次戟鼓車駕牛二乘分左右。次左大鴻臚外掾右五官掾功曹史並駕一次。大鴻臚駕駟戟吏六人。次大司農引從中道大鴻臚主簿主記右少府引從次三卿並騎吏四人。鈴下二人。執馬鞭辟車六人。執方扇羽林十人。朱衣次領軍將軍中道鹵簿左右各二行九尺楯在外弓矢在內。鼓吹如護軍。次後軍將軍在左。右軍將軍在右。各鹵簿。鼓吹如左軍前後。次越騎校尉在左。屯騎在右。各鹵

簿鼓吹如步兵射聲。次領護騎遊軍校尉。皆騎。吏四人。乘馬夾道。都督兵曹各一人。乘馬在中。騎將軍四人。騎校鞞角金鼓鈴下信幡軍校並駕一。功曹史主簿並騎從。繖扇幢麾各一騎。鼓吹一部七騎。次領護軍加大車斧。五官掾騎從。次騎十隊。隊各五十四。將一人。持幢一人。持鞞一人。並騎在前。督戰伯長各一人。並騎在後。羽林騎督幽州突騎督分領之。郎簿十隊。隊各五十人。絳袍將一人。騎鞞各一人在前。督戰伯長一人。步在後。騎皆持稍。次大戟一隊。九尺楯一隊。弓一隊。弩一隊。隊各五十人。黑袴褶將一人。步在

前督戰伯長各人步在後。金顏督將并領之。其屬車因後漢制。東晉屬車五乘而已。其一車又是軺車。舊儀天子所乘。駕六。元興中。屬車唯九乘。苻堅敗。又得偽車輦。增爲十二乘。宋孝建中。尚書令王宏議屬車起秦八十一及三十六乘。並不出經典。自胡廣蔡邕傳說耳。又是從官所乘。非常副車正數。江左五乘則儉不中禮。帝王文物旗旒皆十二爲節。今宜依禮十二乘爲制。後魏道武皇帝天興二年。命禮官採古法制三駕鹵簿。一曰大駕。設五輅。建太常屬車八十一乘。大祠則設之。二曰法駕。屬車三十六乘。小祠則設

之三曰小駕屬車十二乘。遊宴離宮則設之。隋開皇中。大駕十二乘。法駕減半。煬帝大業初。復備八十一乘。並如犢車。紫通幃。朱絲絡網。黃金飾。駕一牛。在鹵簿中。單行正道。後帝嫌多。大駕減爲三十六乘。法駕用十二。小駕除之。唐大駕屬車十二乘。大駕行幸。則分前後於鹵簿之內。若陳設。則分左右。施於衛內。其鹵簿制具開元禮。

器服略第二

